

Kinóló mole ala hąkearaletei

¹ I dere fota, Kótóné Yesu Kerisopaae mo felekemó yaai dere alapa, naao kutó diratere so whinė tuę yópóló, kinóló moletei hąkearóló yó melae, yóló malepó. Ai fo Yesuné wosóló, ama kutó deratere whį Jon beterepaae *ensel* dotonalepó. ² Atétepa, Jon-né ama kelale ala so whį feané tuę yópóló, amamo aseyalepó. Ai fota me kae mei, Kótóné dere foró Yesu Kerisoné ama yale alatamo etérapóló yó male fopó. ³ Take i ala yaalopóló i asęre fo hąkeamó dosąatu betere whį Kótóné wisiró beterapa, hajné sukutu beterópóló yae. Ai dosąatere fo wosóló, hosaa tuąmó mulatere so whįkélé, wisiró beterapóló hajné sukutu betenérápó. Ti ai yó male alarape dokonóló yaaire be dę mo felekemó sókó waai dapó.

Talené doi hale horatere foró kęlé dere fotamo

⁴ Ęta, Jon-né Esia hae kwiamó betó mole węikeró Keriso fake so whįpaae dapó.

Miókélé betóo, takekélé bitiré wóo, nalo waaire alimókélé hąle betóo, yaaire sekéró kale tęteróló kaae tare doasi betere tiki felekemó betere węikeró keperapetamo tuąmó kaaróló wale hamokoróló hąle tao sere alaró, hosaa muni deyóló dua betere alatamo diąpaae erópóló yae. ⁵ Ti Yesu Kerisoné yó matere fota, ama mo kelale alatóró du beterapó. Ti ąta, mo sukąletei kepaayóló betaaire so whįmó, tų aleróló folosóró fóló betere whįpó. Atéturaalu, i haemó betó mole

topo whįrapekélé mo fea amatóro tẹteróló kaae tarapó.

Ai sekéné amatóro diąpaae yaala sókó furaalu, dą dowi ala tuąmó betepa, ama sameanétei ter-aayóló hąle fópóló eró beterapó. ⁶ Téro dą ama tẹteróló kaae tare aąmó sóró beteróló, Alima Kótóné ama ala erópóló, so whįmó momaratere whį sóró beteralepó. Téreteiné, ai seké ama mo kae ere ala wisiró doasi fotokọtamo mo hąle muó tanópóló yae! Mo kée, téyópóló yae!

⁷ I dere fo wosae! ą ó hepen bemó ere sąkotamo wapa, so whį mo feanékélé, take ą duraalu wutiné deyale whįrapenékélé, kelaalo ai ape.

Atéteremó, i hae kwia feamó betóló fale so whįné doasi wole u yaalopó.

Ti ai alata, motóro yaalo ai ape. Mo kée, téyópóló yae!

⁸ Téro Tale Kótóné duraalu,
 “Ęta, *Alaparó Omekatomopó*. Ai fo feteyóló, kaae sereteiró kemeratereteitamota, ti mo ętórótípó. Take bitiré waleteikélé, mió betereteikélé, take nalo betaaireteikélé, ętóro bitu, fea ọla ọla tẹteróló kaae tare seké ętórótípó,” yalepó.

Whįné Naalema aąpa kelale fo

⁹ Ęta, diaaą no Jon-né dapó. Dą fea Yesu tuąmó bitu, seké sere alakélé, ama tẹteróló kaae tare aąmó betere alakélé, hóni hąle belée tare alakélé, dą fea betąmó deté fu betere whįpó. Yesuné yale ala i ape yóló yó melóo, Kótóné fo eróo, yalemó atimané ę wejné bopéro daaló betere hae

Patmos-mó beteralepó. ¹⁰ Atéro betepa, Talené be demó Dęi kepe wisiné fotokę tuęmó bitu, yęlo kęlipaae doasi fo fake ukulumó wutiné hale kaae depa wosalepó. ¹¹ Atéro dere foné duraalu, “Naao keletere ala fea bopeyóló mole sókumó aseyóló, weķkeró Keriso fake so whępaae falae. Ai berape i ape. Efesus, Smerna, Perkamum, Taiyatira, Sardis, Piladelpia, Laodisia, i dosęayale be hu-luamó betó mole Keriso so whę feapaae aseyóló falae,” yalepó.

¹² Ai fo du betepa, né dero sisópaae fetée fóló kelalemó, *kold kapané* aleale weķkeró są dirirape kelalepó. ¹³ Atępa, ai są dirirape duku betere tuę dolomó whę betę Whęiné Naalema kaae daapa kelalepó. Atęru, deróló sókó fatere fęloi kuti deróló, *kold kapané* aleale toné ai kuti tęteróló bopémó sepa kelalepó. ¹⁴ Ama toporó nikitamota, mo yako kaae dę wisinaale yóo, ama kelekélé si mi kaae holóo, depa kelalepó. ¹⁵ Ama hóta, ti *brons kapa* siné dóló whaare kaae yóo, ama dere fokélé, weķi dou kęaturaalu dere hu kaae depa wosalepó. ¹⁶ Ama turu naasené weķkeró hęrerape tawóo, ama kęlómó bóe dele sepake fosó tamo daai sókó wóo, ama kelepaaekélé, sukané dę kaae yóo, epa kelalepó.

¹⁷ Yęlo ę kilituraalu, ę ama hó aęmó sukęle whę kaae deraapisa fóló molepó. Atéro mupa, ama turu naasené ę wolaa yóló duraalu, “Yę wiyaaęse. Kaae sereteikélé, kemetereteikélé, mo ętórótípó. ¹⁸ Ęta, mo ti betere sekępó. Ę take sukęletei, momó kepaayóló mo titóro betó tarapó. Tęruraalu, sukutere alaró sukęle so whętamó

betere tų *ki* ęąo i tare ape.

¹⁹ Tęrapa, naao kelale alakélę, mió i alimó keletere alakélę, nalo betaaire alimó yaaire alakélę aseyae. ²⁰ ęąo turu naasemó mupa, naao kelale ęęikeró hęreraperó *kold kapané* aleale ęęikeró sę dirirapetamo kelale bete i ape. Kale hęrerapeta, ti u ęęikeró be huluarapemó betó mole Keriso so whį tao sępóló, dotonale ęęikeró *ensel-rapepó*. Kale ęęikeró sę dirirapeta, ti ęęikeró be huluamó betó mole Keriso so whįpó,” yalepó.

2

Efesus Keriso so whįpaae aseyóló farale fo

¹ “Efesus be huluamó betó mole Keriso so whį tao sępóló dotęyale *ensel-paae* i fo aseyóló falae.

Turu naasené kale ęęikeró hęrerape taruraalu, *kold kapané* aleale ęęikeró sę dirirape daae mole tuąmó kutu betere sekęné dere fo i ape. ² Dię hękélę ini, mepaae du betere alarape ęąo tuęnipóló de? Dię hękélę ini, depe tukó wei ala hęle yó tare alakélę, kale dowi ala yó tareteikélę, whįrape diętamo betąmó betaqsóro hękó fatu betere alakélę, ęąo tuęrapó.

Mepaae whįrapené duraalu, ‘Dąta, Talené dotonatepa wale *apotel whįrapepó*,’ dere fomó, dięné atima kęae kolóló duraalu, ‘Dięta kapala fo bole whįrapepó dere alakélę kolóló, ęąo mo tuęrapó.’ ³ Dię ęąo so whį betepa, mepaae sekęi ala ó faletere alarape wou betepatei dię hęyóló dekani, ęąo doimó hęle yó tarapó.

⁴ Tępatei, ęąo keletepa wisinire ala betę i ape.

Take kaae suraalu diaaą yaala sókó fu betale ala mió taaló beterapó. ⁵ Téraąa, take diaaą yaala sókó fu betale ala taaróló, mió dią haepaae ai derepalapa kisipa muae. Atétu, diaaą kisipa tiki feteyóló take du betale ala momó yae. Dią ai alatamo initepa, ti ę dią beterepaae wóló diąné dęrótu betere są ęąło tokó saalopó. ⁶ Téretei, diaaą du betere alamó ęąło i yaaitere fo betą mo wisirapó. Nikolas whįrapené hótu betere kaae diaaąkéle atétu beterapó. ⁷ Mepaae whį me de wosęli daapa, ti Dęi Kepe Wisiné kae kae Keriso so whįpaae du betere fo feané wosópóló yae. Whį me de tų wisipaae faai fupa, me sekei alané sesé depakélé hepée taae faróló wale whįta, Kótó betere kelaalo mo kokęi tikimó daale kepaayóló mo ti betaaire ni du wisi nópóló ęąło melaalopó,” yalepó.

Smerna Keriso so whįpaae aseýóló farale fo

⁸ “Smerna be huluamó betó mole Keriso so whį tao sópóló dotonale *ensel*-paae i fo aseýóló falae.

I dere fota, kaae sereteiró kemeręle fo-leteitamoné bete Tale ą mo ti sukąletei, momó kepaayóló betere sekęné dapó. ⁹ Diąpaae kae kae sekei alarape wou bituraalu, yoleale yóló betere ala ęąło tuęretei, doasi dirii ęła wisi-naale betą diąné sóró tareteiné, dią doasi néli whį kaae ai betere ape. Mepaae so whį atima Juda fakepó du beteretei kapala fo dapó. Ti atimata, Satan-né fo wosetere fake bituraalu, dią erótu betere fo ęąło kisiparapó. ¹⁰ Diąpaae sekei ala waairemó wiyaąse yóló, ma fo i dapa

wosae. Dią betere ala kęae kelaairaalu, Satan-né dią mepaae so whį *dipula* beteraalo ai ape. Atéró *dipula* beteró betepa, sekęi ala siré fu bituraalu, naase tamo be dęrape kemeyaalopó. Dią dupakélé me ęla meipóló, tuę tiki tiraté fu betepa, ti atétere whįrapemó bóené whį dolóló kemeratere whįné deratere topo tao su dere kaae, yęlo mo ti betere bete melaalo ai ape. ¹¹ Mepaae whį de wosęli daapata, kale Dęi Kepe Wisiné Keriso fakerapepaae i dere fo wosópoló yae. Whį me de tu wisipaae faai fełalemó sesétepakélé, hepée taae faróló wapata, ti atétere whį ą tamoróló sukutere alané doraalo meipó.”

Pergamum Keriso so whįpaae aseýóló farale fo

¹² “Perkamum be huluamó betó mole Keriso so whį tao sópóló dotonale *ensel*-paae i fo aseýóló falae.

Fosó tamo daale bóe dele sepake tare sekéné dere fo i ape. ¹³ Diąta, Satan-né ama tęteróló kaae tare tikimó betereitei yęlo kisiparapó. Dią atéró bitutei, yęlo doimó du betere ala taaréni, hęle yó tarapó. Take yęlo ala erótu betale whį Antipas dale alimó, diąné ępaae tuę tiki tiratere ala taaréni, hęle yó tawaletai yęlo tuęrapó. Ti diąta, Satan betere be huluamó ai betere ape. ¹⁴ Tépateti, diaaę dere mepaae ala yęlo keletómó wisinireitei i ape. Dią betó mole kua dolomó, mepaae so whį Balam-né hęko yó mótu betale ala kaae du beteraapó. Balam-né Balak-paae Israel fake so whį dowi ala yópoló, etéró yae yóló yó melalepó. Balak-né Israel fake so whį kapala

kótópaae moma yóló matere ularó nópu nokole alatamo yópóló, ąlisóró fipakalepó. ¹⁵ Atétu betere kaae, dią mepaae whįrapekélé Nikolas whįrapené yó matere ala sya fu beterapó. ¹⁶ Térapa, diaaq ai du betere ala taaróló, kisipa tiki feteyóló betae. Diątamo ai ala initepa, ti ę dią beterepaae hapale sókó wóló, dią ai ala du betere whįrapetamo ąło kólómó sókó wale sepakené bóe daalopó. ¹⁷ Mepaae whį de wosęli daapata, kale Dęi Kepe Wisiné Keriso fakerapepaae du betere fo wosópóló yae. Whį me de tu wisipaae faai fenalemó sesétepakélé, hepée taae faróló wapa, ti atétere whįmó ąło hyq muló betere mepaae *mana* o nópóló melaalopó. Téturaalu, kisi doi aseýóló muló betere dęi kane fakekélé melaalopó. Ai kane fakemó aseęre doita, hąle mo whįné tuę yaalo meitei, ai kane fake sere whįné maaté tuę yaalopó.”

Taiyatira Keriso so whįpaae aseýóló farale fo

¹⁸ “Taiyatira be huluamó betó mole Keriso so whį tao sópóló, dotonale *ensel*-paae i fo aseýóló falae.

I dere fota, Kótó Naalema ama kele mo si kaae dó taru, hęlekekélé kale *brons kapa* siné dóló kasa kasa kaae ere sekęné dapó. ¹⁹ Diaaq yaala sókó fole alakélé, diaaq tuę tiki tiratere alakélé, ąło doimó mo so whį tao sóró erótu betere alakélé, sekę wapatei beléetóro tare alakélé, diaaq mió du betere alané take kaae suraalu yale ala bosene faletei, fea ąło tuęrapó. ²⁰ Téptei, kale so Jesepel ą fópóló

mo taketitei hąkó faréniyólópó. Ai soné amatei ą Kótóné fo eratere kłó sopó du beteraópó. Téturaalu, ama yó matere fonétei, yąło kutó diratere whįrape nópu nokole ala yóo, kapala kótópaae momatere ąła nńpóló ąlisóró fóo, du beteraópó. ²¹ Ai soné nópu nuku betere ala taaróló, kisipa feteyóló wńpóló kaae taté fu betepatei, wéni mo dowąae fu beteraópó. ²² Até du betereiteiné, ą dele sóró fitere tikimótóró fiyó mulńpóló, taae deraalópó. Téturaalu, ątamo nópu nuku betere whįrapekélé kale soné atimapaee yó melale dowi ala taaróló, tuę tiki feteyóló anitepa, ti atimakélé kale so dere kaae, dele sńpóló taae deraalópó. ²³ Ai soné ama naale senaalekélé sinńpóló, yąło mo ti daalópó. Ai ala depa, Keriso fake so whį feané kilitu, ęta, so whįné hosaa tuąmó mole alaró tuę tikitamo taleyóló, atimané yale alamó mo donotóró tokń matere Tale beteraópóló kisipa yaalo ai ape. ²⁴ Dią mepaae Taiyatira be huluamó betó mole Keriso so whį kale soné yó matere fo wosóló sya feni yóo, Satan-né mo apaae derepale kinóló mole ala kisipa sini yóo, ere so whįpaae yąło sekei ala kae eraalo meipó. ²⁵ Téyaalomeipa, ę wale alimó sókó faasepóló, diaą ai du betere wisi alatóró ąle yó taté fo betae.

²⁶ Whį me de tu wisipaae faai fenalemó, me sekei alané sesé depakélé, hepée taae faróló, kemene fole kwiamó sókó fupa, ti atétere whį i hae kwiamó betó mole so whį fea tęteróló kaae tanńpóló, yąło sóró beteraalópó.

²⁷ Ašemó ere fo i ape.

‘Topo whįné tatere *aiyon kapa*-né aleale dotótiki taru, haené aleale wuti derąketu dere kaae, ęalo bóe whįrape ai ala yaalopó,’ erapó.

ęalo Ayané ę so whį tęteróló kaae tanópoló sóró beterótu yale kaae, ęalokélé dię sóró beter-aalo ai ape. ²⁸ Atéro sóró beteratere so whįpaae hįka be dęteretamo dęyó tare hęrekélé, ęalo melaalopó. ²⁹ Mepaae so whį me wosęli daap-ata, kale Dęi Kepe Wisiné Keriso fakerapepaae i du betere fo wosóló tuę muópoló yae,” yalepó.

3

Sardis Keriso so whįpaae aseýóló farale fo

¹ “Sardis be huluamó betó mole Keriso so whį tao sópoló dotęyale *ensel*-paae i fo aseýóló falae.

Kótóné węikeró kepe tawóo, węikeró hęrerape tawóo, ere whįné dere fo i ape. Dięné du betere ala ęalo kolóló kisiparapó. Mepaae so whįné dię kilituraalu, i Keriso faketa, Kótóné ala eraai noke fini, mo doa ketekę bulapóló dukiróturaalu, diaaę doi só kutu beterepó. Téretei dię ęalo keletepa sukąle whį aęrapó.

² Dię fire whįrape-ó, turukó horóló betae! Diaaę du betale wisi ala fea sisiraae fóló betą betą beteretei felekemó sukąai dapa, fotokę buóló daayae. Ti noatepae, ę tęteróló kaae tare Kótóné keletómó diaaę erótu betere ala mo turó kemeróló, ama muló betere dąlemó sókó fenipó. ³ Térapa, dięné take wosóló tuęre fo kisipa muae. Ai fo aęmó sukóló bitu, kisipa feteyóló ai fo sya fóló erótu betae. ę waaire be

de dią kisipani, mokųleyaa yóló betó mupa, ę ęłémi nokole whį kaae, sókó waalo ai ape.

⁴ Téyaalotei, dią Sardis bemó betere whįrape kuamó betą betą so whįné deró betere kuti mo wisiyóló kaae tare tikimó, bólukélé inipó. Ai whįrapeta, deį kuti deróló ętamo kwęyaalopó. Ti noatepae, atima dere ala wisireteiné ai ala yaaire mo sųrapó. ⁵ Whį me de tų wisipaae faai fenalemó, sesé depakélé hepée taae faróló wale whįta, ti u kale so whįné deró betere deį kuti kaaetóro deraalo ai ape. Ai whįné ama doita, mo titóro betó tare *buk*-mó moletei yąlo helekókéle yaalo meipó. Téni, yąlo Ayaró ama *ensel*-rapetamoné keletómó daalu, ita yąlo whįpóló, yó melaalopó. ⁶ Mepaae whį de wosęli daapa, ti kale Deį Kepe Wisiné Keriso fakerapepaae du betere fo wosóló tuę muópoló yae,” yalepó.

Filadelpia Keriso so whįpaae aseýóló farale fo

⁷ “Filadelpia be huluamó betó mole Keriso so whį tao sópóló dotęyale *ensel*-paae i fo aseýóló falae.

I dere fota mo fo bete Tale dowi ala betąkélé muni, kae betere sekéné dapó. Take betale whį Depit-né *ki* mió yąlo i tare ape. Yąlo kinatere tų me whįné tukjyóo, yąlo tukwę mulatere tų mené kinóo, enénipó. ⁸ Diaaq du betere ala yąlo kisiparapó. Dią faaire tų yąlo ai tukwę muló beterapa kelae. Ai tųta, whį mené kinatere alakélé mo enénipó. Dią fotokų sawa bulutei, yąlo fo hąle eró tarapó. Téru, mepaae so whįné yąlo doi yóló, dią Talené so whįé yóló

wosetepa, diąné meipó initeretei yało mo kisi-parapó. ⁹ Mepaae whį atimata, Juda fakepó du betepatei, Juda fake mei, kapala fo du beterapó. Ai so whįta, dowi Satan-né fo wosetere fake ai ape. Atima dią beterepaae wóló, diaaą hó aąmó deraapisa fóló fió muluraalu, i so whįta Yesuné yaala sókó fole ala mulapó yópóló, dere ala yało eraalopó. ¹⁰ Yało diąpaae sekeį ala wapakélé hąle eró tawae yale fo diaaą wosóló eró tawalepó. Téyaletiné i haemó betó mole so whį fea sų sóró kąae keletere sekeį wale sukamó, diąpaae waąsóró yało sesé yaalopó.

¹¹ Ę mo felekemó walapó. Bóe dóló tẹteratere whįné sere topo tao diaaą saairetei, mené saąsóró diąné tẹteróló kaae tanópóló male ąla wisi mo hotowayóló kae tawae. ¹² Whį me de tų wisipaae faai fenalemó, sesé depakélé hepée taae faróló wapa, ti atétere whį ę tẹteróló kaae tare Kótóné momatere be hulua eleké sų deyaalopó. Atétere seké ą ai be taaróló fókélé mo yaalomeipó. Ai whįné tikimó ę tẹteróló kaae tare Kótóné doiró ama be hulua doitamo aseyaalopó. Ti ai be hulua doita, kisi Jerusalem-pó. Ai be huluata, ę tẹteróló kaae tare Kótó betere hepen be taaróló, dorowaalo ai ape. Ai whįné tikimó yało kisi doikélé aseyaalopó. ¹³ Mepaae whį de wosęli daapa, ti kale Dęi Kepe Wisiné Keriso fakerapepaae i dere fo wosóló tuę muópóló yae,” yalepó.

Laodisia Keriso so whįpaae aseýóló farale fo

¹⁴ “Laodisia be huluamó betó mole Keriso so whį tao sópóló dotonale *ensel*-paae i fo aseýóló

falae.

I dere fota, Mo kée, téyópoló yae! dere bete Tale bitu, mo ala yó taruraalu, ama kelale ala i ape yóló hąkearóló yó mótu beterapó. Aąta, Kótóné aleyóló muló betere ąla ąla fea tęteróló kaae tare sekéné dapa wosae. ¹⁵ Diąné du betere alata yąlo tuęretei, sirii ala ó supui ala meiyóló, hąle tuąmó beterapó. Ai tamo ala me taaróló betą alatóró uąsóró ti mo wisi wuąpó. ¹⁶ Ti diąta, supukélé meiyóo, sirikélé meiyóo, yóló hį fale ąla kaae epa kilitu, yąlo kólómó hamuóló soraae falatere ąla kaae so-raae faraalo ai ape. ¹⁷ Diąné duraalu, ‘Dąta, wisi wisi ąla mole néli whį betereiteiné mo betą ąlakélé yąyąnipó,’ dua dapó. Téretei, Tale Kótóné dią keletepa, mo sonaaei so whį betepa kilitu, kọlerapó du beterapó. Diąta, yolealere alakélé, kele dilikire alakélé tiki daapi hąle betere alakélé, epatei, diaaą kisipané wisire nisi dapó. ¹⁸ Yąlo i dere ma fo wisi wosóló, i sore ąla diąné ętamo dupu yae. Siné biliyaletikimó wisiyóló sókó wale *kold kapa* supa, ti dią mo doasi néli whį betaalo ai ape. Dią tiki hąleretei, kinóló deį kuti sóró bukae. Diaaą kele dilikiretei wisiyópoló, yąlo i tare *mula mula* sóró dilae.

¹⁹ Yąlo yaala sókó fale so whį atima kae kae dowi ala depa kilitu, tu wisipaae fópóló donoróturaalu, yąlo atima foné sóró dekésu beterapó. Térapa, yąlo diąpaae dowi ala taalae du betere fo mopóló, tuę tiki feteyóló Tale Kótóné alamó ketekeę buóló betae. ²⁰ Ęta, tu sókó walemó daalu, tu du beterapó. Whį me

denétamo yało dere fo wosóló tų tukutepa, ti ę ą betere tuąpaae wóló, ątamo ęła betąmó nóo, ąkélé ętamo ęła betąmó nóo, yaalo ai ape.

²¹ Ę tų wisipaae folemó sekei alané sesé depatei, hepée taae faróló, yało Ayané tętéróló kaae tare tikimó ątamó betąmó betalepó. Atére kaae, diąkélé tų wisipaae fole ala kilitu sesé depatei, hepée taae faróló wapa, ti yało tętéróló kae tare tikimó ętamo betąmó sóró beter-aalopó. ²² Mepaae whi de wosęli daapa, ti kale Dęi Kepe Wisiné Keriso fakerapepaae i dere fo feané wosóló tuę muópóló yae,” yalepó.

4

Hepen-mó tętéróló kaae tare tiki

¹ Ai alarape yóló kemetepa kelalemó, hepen be tų tukwę fóló molepó. Atéru, folosóro ukulumó wuti hale kaae yóló fo yale whinétóro ępaae duraalu “Yą ipaae holae yalepó. Yą hotopa, ti i alarape yóló kemene fupa, nalo yaaire ala yało ępaae yó melaalopó,” yalepó.

² Tétépa, mo ai fapotóro Dęi Kepe Wisiné ę fotonęratepa kelalemó, hepen bemó ę daalepaae anóló, tętéróló kaae tare topo whi betere sea tómó doasi beterepó. ³ Ai seamó betere doasi kolóló, *jasparó kanilian* kanetamoné kasa kasa kaae ere doasi beterepó. Ti ai sekę ą betere tikita, sikipa douné bopéro beterepó. Ai sikipa douęta, *emerald* kane kasa kasa kaae epa kelalepó. ⁴ Kale tętéróló kaae tare doasi betere tiki bopéroló, 24 whi disirape 24 sea dokęyóló betó molepó. Ai sekęrape atimané deró betere kutita, mo dęi wisinaale

deróo, atimané topomókélé tẹteróló kaae tare doasiné deró betere *kold kapané* aleale topo tao deróo epa kelalepó. ⁵ Ai kale doasi betere tikimó epée fitąa duraalu, be sapalaa yóo, tẹteróló kaae tare doasiné kutiriró beterepaae anóló, wẹikeró są dirirape dó diliki yóo, erepó. Ai są dirirapeta, Kótóné wẹikeró keperapepó. ⁶ Atéro kelalemó, kale tẹteróló kaae tare *sea* mole hosaamó wẹi kẹla wisinaale belerepó. Ai wẹita, *klas* kasa kasa kaae erepó.

Kale tẹteróló kaae tare doasi betere tuąmó, Kótóné aleale douró betere ọlarape ai doasi bopéróló betó molepó. Ai kale douró betere ọlané tikimó hosaapaaekélé sisópaekélé mo fea keletóro daae molepó. ⁷ Kale douró betere ọlarapéné ere ala i ape. Kolosale ọlata, ti *laiyon* kaae beterepó. Kolosale noma ọla ti hae dukįyaaí só kotere *bulmakau* wą hupu kaae beterepó. Dou noma ti whįné kelepaa kaae daai ọla beterepó. Dou ti sikimó sẹ kotere ba dukaa kaae beterepó. ⁸ Ai douró ọlarape atima dokọ fea baase apomiró daalepó. Atimané tikimó ere kaae baase aọrókélé keletóro daae molepó. Ti ai sekẹrape atima dẹtamokélé dikitamokélé etei fo hąle yótóro tarapó.

“Mo doasi fotokọ bole mo kae betere Tale Kótó ą take biteré wóo, miókélé, nalo waaire alimókélé ątóro hąle betó tawaalopó fo,”
momó du momó du, du betalepó. ⁹ Ai douró betere ọlarape atima kale tẹteróló kaae tare doasi betere tikimó bitu ama ere doakale doi mole Talepae mo kée yóló dukiraterere fo du betepa,

kale tẹteróló kaae tare 24 whị disirapekélé i ala dua dapó. Atima betere searape taaróló, haemó deraapisa fóló mulu, kale tẹteróló kaae tare doasi betere tikimó mo ti betó tare Talepaae mo kée yóló, ą aqmó sukóló bitua dapó. ¹⁰ Ai 24 whị disirape atimané deró betere topo taorape sókó su yóló, tẹteróló kaae tare doasi betere tiki felekemó mulóló duraalu,

¹¹ “Dą tẹteróló kaae tare Tale Kótóo, fea ọla naaotóró aleyóló muló beterapó.

Aita naao kisipa mole alatóró sya furaalu, kaaró betereteiné takekélé miókélé, atima hąle betó tarapó.

Naao fotokóné ai alarape epa yą doasi doi mulatere alakélé, naao doi hale horatere alakélé, dąné yąpaae mo sụmó eranérápó,” dua dapó.

5

Bopeyóló muló betere asẹre sókuró Sipsip hupu maletamomó ere fo

¹ Téro yąlo kelalemó, kale tẹteróló kaae tare doasi ą seamó bitu, betą bopeyóló mole sóku utékélé itékélé asẹretei, ama turu naasené tarepó. Ai asẹ mo whịné kelaqsóro, kinóló wẹikeró dirii ọlané diriróló datekọró betepa kelalepó.

² Atépa, mo doakale fotokọ bole *ensel*-né fo fakeyóló duraalu, “I bopeyóló mole asẹ datekọró betere ọlarape mé whịné dąayóló teraanére?” yalepó. ³ Térené ó hepen bemókélé, i haemókélé, hae aqrókélé, ai bopeyóló muló beteretei teraayóo, u tuąmó asẹyóló mole fokélé kolóo yaaire

whį mo betąkókélé bitinipó. ⁴ Kale bopeyóló muló betere ęla teraayóo, tuąmó aseýóló muló betere fo kolóo, yaai sųre whį mo betąkélé bitinipa kilitu, ę dekęné sini wole du betalepó. ⁵ Atétu betalemó, kale whį disirapekó betąné ępaae duraalu, “Wolekesé. Juda fake tuąmó wale *Laiyon*-ta, Depit kaayale bete ai walapa kelae. Ai sekéné ama bóe whį dóló tęteró betereteiné kale bopeyóló mole asę datekąró betere węikeró ęlarape ama betą sųmó tukóló dąanérápó,” yalepó.

⁶ Atétepa kelalemó, betą *sipsip* hupu male tęteróló kaae tare doasi betere tuąmó daalepó. Ai *sipsip* hupu maleta, whįné daletikimó sukęle nisi erepó. ą doasi betere tuą dolomó, kale douró betere ęlaraperó 24 whį disirapetamoné ą bopéróló daae molepó. Ai tuąmó daale *Sipsip* hupu malené topomó węikeró sekéro węikeró kelerapetamo daae molepó. Ai sekéro keperapetamota, Kótóné i hae kwiamó betó mole so whįpaae dotonale węikeró keperapepó. ⁷ Ai seké ą wóló, kale bopeyóló muló betere asęre sóku, kale tęteróló kaae tare tikimó betere doasiné turu naasené tapa salepó. ⁸ Kale sekéné asęre sóku sóró tapa kilitu, douró betere ęlaraperó kale tęteróló kaae tare 24 whį disirapetamo atima kale *Sipsip* hupu male daale felekemó deraapisa fóló fió molepó. Ai whįrape atima dokę feané *kita* kaae ęla *harp* tawóo *kold kapané* aleale okopoi nukurape tawóo, erepó. Ai nukurape tómó simó bilitępa felé kęlaa wisi wale ęlarape belerepó. Ti ai felé kęlaa wisi wale ęlata, Kótóné ama so

whipóló kae betero betere so whiné momatere fopó. ⁹ Téro atimané kisi wole foné duraalu,

“Yąta, ai bopeyóló muló betere asęre sóku ter-aayaaire mo sųrapó.

Ti noatepae, yą dupa sókó fele sameané Kótóné so whį beteraai, kae kae fakekélé, kae kae be fo bole so whįkélé, kae kae tiki daale so whįkélé, kae kae *Gavman*-né tęteróló kaae tare so whįkélé, i dosąayale fakerape tuąmó mepaae so whį naao sameané dupuralepó.

¹⁰ Naao dupurale so whį atimata, Kótóné tęteróló kaae tare aąmó betóo, Kótóné ala eróturaalu moma yóo, yópóló naautei sóró beteralepó.

Atýale so whį atimané i hae kwia fea tęteróló kaae tawaalo ai ape,” yalepó.

¹¹ Téro yąlo kelalemó, kale doasi betere *sea* bopéróló douřó betere ąlarape daayóo, ai sisómó 24 whį disirape daayóo, ai tę faróló *ensel*-rape mo ni sóku kaae (100,000,000) wó mulu, i wole fo du betepa wosalepó.

¹² “Tęteróló kaae tare fotokąkélé, mepaae wisi wisi ąlakélé, fosó fosói kisipakélé, fotokąkélé, doasi doi mole alakélé, ama ere ala wisi hąkearatereteikélé, ama doi sóró horatere alakélé, fea dąné ąpaae eratepa, kale dale *Sipsip* hupu malené mo sųmó senérapó,” du betalepó.

¹³ Téro, Kótóné hepen bemó aleyóló muló betere ąlakélé, i hae tómó betó mole ąlakélé, hae aąró betó mole ąlarapekélé, węi tuąmó betó mole

qlarape feané kóló betąpaae touróló i wole fo du betepa yało wosalepó.

“Kale tẹteróló kaae tare *seamó* betere sekęró *Sipsip* hupu maletamo dukiróló hale horatere alakélé,

doasi doi mulatere alakélé, ama ere ala wisi hąkearatere alakélé,

fotokę bole alakélé,

betere dokę fea atimaamopaae eraté fu beterópóló yae!” du betalepó.

¹⁴ Atétu betepa, kale douró betere qlarapené duraalu, “Mó kée, téyópóló yae,” fo dekeró yó tawalepó. Atimané ai fo depa, kale 24 whį disirape deraapisa fóló mulu, Talené doi sóró horótu betalepó.

6

Diriróló kinó betere qlarape

¹ Téro, kale *Sipsip* hupu malené bopeyóló mole asęre sóku diriróló kinó betere węikéro ęla betą tukóló teraatepa kaae taremó, ai douró betere ęlakó betąné “Ape!” dere fo be sapalaa dere kaae yalepó. ² Atétepa kelalemó, betą deį *hos* hupu ę daalepaae anóló mo tumó daalepó. Ai *hos* hupu tómó betere whįné diki tawóo, doasi tẹteróló kaae tare whįné deratene topo tao mené ą maletci deróo erepó. Atéro deróló, bóe whį dóló torokę falaai mo doakale ketekę buló felepó.

³ Kale *Sipsip* hupu malené kolosale noma kinóló datekęró betere ęla tukóló dąyayalemó, kale kolosale noma betere ęlané, “Ape!” yalepó. ⁴ Teró me *hos* hupu sókó wapa kelalemó, mo si mi sonaa

kaae erepó. Ai hupu tómó betóló wale whıpaae, i haemó mole so whı hosaa muni deyóló dua betere ala fasó sóró, bóe dóló u du i du yópóló, mené fotokọ ąmó malepó. Téturaalu, ąpaae doasi bóe dele sepakekélé mené melalepó.

⁵ Téro, kale *Sipsip* hupu malené dou noma ąla tukóló dąyalemó, kale dou noma betere ąlané duraalu, “Ape!” yalepó. Atétepa kaae taremó, dilikii *hos* hupu wóló ę daalepaae anóló daalu, betą sekę dąle sere ąla *skel* tarepó. ⁶ Atétepa, yąlo wosalemó, kale douró betere ąlarape kuamó whıné fo kaae yóló duraalu, “Betą whı betą be dęmó kutó diteremó sere *moniné whit* o betą *lita ó bali* o sore *lita* wuti senérapó. Térapa, nokole *Olip wel* węiró *wain* węıtamo betą doraąsóró hotowaró kaae tawae,” yalepó.

⁷ Téro, kale *Sipsip* hupu malené dou kinó betere ąla tukóló teraatepa kaae taremó, dou betere ąlané duraalu, “Ape!” yalepó. ⁸ Atétepa ke-lalemó, ę daalepaae anóló betą sini tiki daale *hos* hupu daalepó. Ai *hos* hupu tómóta, sukutere ala bete tare whı beterepó. Ai *hos*-né sisómó sukutere ala betepa, ai hupuné kılímó sukutere so whı betere tiki ama doi *Hedis* wou betalepó. Ai whı tamopaae, hae kwia feamó betóló fale so whı dópóló fotokọ bulalepó. Ti so whı daaireteita, atimaamoné bóe dele sepakenékélé, wote alinékélé, doakale hepo alinékélé, i haemó betó mole syaae kaae ąlanékélé, dilé kweyópóló fotokọ sýmó melalepó. Atéro dilé kuturaalu, douró fake beteretei betą fake duraalu, sore fake beterópóló taaraalopó. I hae kwia feamó betóló fale so whı

atéro dilé kwęyóló kemerae, yóló fotokọ sụmó matepa tarepó.

⁹ Téro kale *Sipsip* hupu malené apo kinó betere ọla tukóló teraatapa kaae taremó, momatere kapo daale aqomó keperape betó mupa kelalepó. Ai keperapeta, Kótóné fọ yó matere alaró Yesu Keriso etei kaae Talepóló yó matere alatamo deremó, mepaae whịné dale keperapó. ¹⁰ Ai sekẹrape atimané fo fake yóló duraalu, “Mo fo fąanuraalu betere bete tale bitu, fea ala tẹteróló kaae tare Tale-ó, i haemó betó mole so whịné dowi alaró dą duraalu sókó farale sameatamomó tale yóló kwia melaaire be dẹ wópóló meteró felimó kaae tawóló betaaloé?” yalepó. ¹¹ Atéro atima dokọ feamó deróló sókó fatere dẹi kuti melóló duraalu, “Dią betą kutó diratere norape atimakélé mené dópóló sawa kaae tawae. Ti noatepae, i dosąayale daaire whịrape fea sụmó dóló kemeréni teópó,” yalepó.

¹² Yąlo kaae taremó, apomiró datekọró betere ọla tukóló teraayalepó. Atéro teraateremó, doakale bao yóló, suka mo ti diliki yóo, wéliékélé mo samea betąae fọ erepó. ¹³ Sụmó daae mole họrerapekélé, doakale beséné nose du hara torokó derótu dere kaae torokó deralepó. ¹⁴ Sąta, asẹtere sóku bopetu dere kaae bopeté fóló alune felepó. Hae kwia feamó daae mole hasi fosórapekélé, wẹiné tukóló bopéro betere haerapekélé, daale tiki taaróló, kae tikipaae daane felepó.

¹⁵ Hae kwia fea tẹteróló kaae tare topo whịrapekélé, atima betale sirimó betaaire naaler-

apekélé, diki tare whįrape tẹteróló kaae tare topo whįrapekélé, néli whįrapekélé, bóe dele fotokọ bole whįrapekélé, wae sóró beteratere whįrapekélé, kọleaané betó mole whįkélé, kapo dolopaae hyó muni fóo, kapo beléli dolopaae hyó muni fóo yalepó. ¹⁶ Atima atéro fóló bituraalu, hasi fosópaaekélé, kapo fakepaaekélé duraalu, “Kolokó dorowouraalu dą tẹiyane dere ape. Ti noatepae, tẹteróló kaae tare tikimó betere sekéné kelepaaró *Sipsip* hupu maaletamoné fopaae bole alatamo dąné kelaqsóró kinae. ¹⁷ Ti noatepa meipó. Atimaamoné doakale fopaae butu kwia matere be dẹ ai sókó wale ape. Atétere be dẹmó de daanére? Mo daayókélé enénipa wiyae,” du betalepó.

7

144,000 so whį sirirale fo

¹ Ai ala yóló kįlipaae i douró hae kwiamó douró *ensel* dokọ yóló daapa kelalepó. Atéro daalu, haepaaekélé, doasi wẹi kẹlapaaekélé, besẹ tiki waqsóró, atima dokọ feané sesétu beterepó. ²⁻³ Atéro, *ensel* me kae suka hoteró ẹ daalepaae wou betepa kelalepó. Ai *ensel*-né mo ti betere Kótóné siriró betere ọla tarepó. Ai *ensel*-né haekélé, wẹi kẹlakélé, doraaire fotokọ bole douró *ensel*-rapepaae fo fakeyóló duraalu, “Kótóné kutó diratere so whįné kutirimó siripi eraaipa, hae tikikélé, wẹi kẹlakélé, nirapekélé, hapale doréni kaae tawae,” yalepó. ⁴ Ai sirirale so whį dosąatepa yalo wosaletci i ape. 144,000 so whįta, Israel fakerapetórótípó.

5-8 Juda fake dosąayóló sirirale so whį dokọ sóró touróturaalu 12,000-rópó.

Ruben-né fake touróturaalu 12,000,
 Kad-né fake touróturaalu 12,000,
 Aser-né fake touróturaalu 12,000,
 Naptaliné fake touróturaalu 12,000,
 Manasené fake touróturaalu 12,000,
 Simeon-né fake touróturaalu 12,000,
 Lipainé fake touróturaalu 12,000,
 Isakar-né fake touróturaalu 12,000,
 Sepulun-né fake touróturaalu 12,000,
 Josep-né fake touróturaalu 12,000,
 Benjamin-né fake touróturaalu 12,000-rópó.

So whį hąle ąla kaae dęi kuti deróló daae mole fo

⁹ Ai ala yóló kemetepa kese faralemó, so whį mo hąle ąla kaae daae molepó. Ai daae mole so whįta, betą be huluamó maaté wenipó. Kae kae *Gavman*-né tęteróló kaae tare so whįkélé, kae kae tiki daale so whįkélé, kae kae be fo bole so whįkélé, kae kae fake so whįkélé, kale tęteróló kaae tare tikimó mole *searó Sipsip* hupu maletamo betere hosaamó daae mupa kelalepó. Atéró daae mulu, dęi deróló sókó fatere kutirape deróo, olóu dąarape tawóo erepó. ¹⁰ Téró, ai daae mole so whįné doasi fo fakeyóló duraalu,

“Tęteróló kaae tare *seamó* betere Kótóró *Sipsip* hupu maletamoné dą mo ti aluyaąsóró tao su betere beteta, mo atimaamotórótípó,” yalepó.

¹¹ Ai daae mole *ensel*-rape fea, tęteróló kaae tare doasi betere tikikélé, kale whį disirapekélé, kale

doųró betere ęlarapekélé, bopéróló daae molepó.
 Tęteróló kaae tare doasi betere *sea* molepaae
 fetée fóló, Kótó betere aęmó deraapisa fóló fió
 mulu duraalu,

¹² “Mo dapó.

Téyópóló yae! yóló, hale sóró horatere alakélé,
 mo deį ala wisikélé, tuę tiki fosó fosó yóló
 dotoróę fole alakélé,
 mo kée du betere alakélé,
 doakale doi mulópóló du betere alakélé,
 fea ala yaaire fotokę sųmó bole alakélé
 da tęteróló kaae tare Kótópaae betere dokę fea yó
 tanópóló yae.

Mo kée. Téyópóló yae!” du betalepó.

¹³ Téro, kale tęteróló kaae diliki yó mole whį
 disirapekó betané ępaae woseturaalu, “I deį fęló
 kuti deró betere so whįrape-a, demaaté? Mopaae
 wale so whię?” yóló wosalepó.

¹⁴ Ti fo depa yąło ąpaae tokó mótu duraalu,
 “Doa whį-ó, naao ai tuęre ape,” depa, kale sekéné
 ępaae duraalu, “I daae mole so whį atimata, doasi
 sekęi ala hąle beleté waletiné atima deró betere
 kutikélé *Sipsip* hupu male sameané fokale tikimó
 mo deį ai erapa kelere? ¹⁵ Atéyale tikimó,

“Tęteróló kaae tare Kótó ama *seamó* betepa,
 atima ą beterepaae kese anóló bitu, ama
 momatere bemó mole ala deįtamokélé,
 dikitamokélé, hąle erótu beterapó. Até du
 betepa, tęteróló kaae tare doasi ą betere
 tikimó bituraalu, ama atima wisiyóló
 beterópóló, kuti be tęnútu betaalopó.

16 Atéru, wote dere alaró węi nokole dere alatamo momó kae yaalomei ai ape.

Suka supunékélé, mo hąle supunékélé atimané tiki mo doraalomeipó.

17 Ti noatepae, ęęteróló kaae tare doasi betere tuąmó daale *Sipsip* hupu maleta, hupu kaae tare whinė dere kaae, atima mo wisi yóló kaae tarapó.

Atima dape sóró mo ti betere bete tuąmó wó tare węi nópóló ąlisóró faalo ai ape.

Atéró betepa, Kótóné atima kelemó dorowou betere wole kaape fea helekóló kópuraalopó, ’ ” yalepó.

8

Węike diriróló kinó betere ąla tukóló teraayale fo

¹ Téró, kale *Sipsip* hupu malené kinó betere węike ąla tukóló teraayalemó, ó hepen bemó fo mo sawakélé ini, hąle hipa fi betepa suka kele 30-*minit* kemeyalepó.

² Atépa kelalemó, Kótó betere felekemó daae mole węikeró *ensel*-rapepaae ukulumó wuti betą betą yóló melalepó.

³ Atéró kelalemó, me *ensel*-né *kold kapané* aleale okopoi nuku tarepó. Ai nuku tómóta, felé ąlaaa wale fetera kaae ąla belerótua dapó. Ai ąla só wóló, simó sukųlaa daróló momatere tikimó daapa, si keletómó biliratepa felé ąlaaa wisi wale ąla mené ąpaae mo dekéró malepó. Ai felé ąlaaa wale ąlaró Talené kae beteró betere so whinė dere momatamo touróló, doasi betere *sea*

molepaae anóló, *kold kapa*né aleale momatere tikimó, Talepaae melaai sóró walepó. ⁴ Téro, kale felé kęlaa wisi sukuli kaae, *ensel*-né naase taaróló, Kótó beterepaae holalepó. ⁵ Téro, kale *ensel*-né okopoi nuku taruraalu, kale momatere tikimó duku betere si kelerape kęae sóró nuku ęanóló, i haepaae taae deralepó. Tęyalemó, epée fitęa yóo, doasi be sapalaa dorowóo, bao doasi yóo yalepó.

Kale węikeró ukulumó wutirapené haleraletei

⁶ Węikeró *ensel*-rape ukulumó wuti haleraai donoróló daae molepó.

⁷ Kale kolosale *ensel*-né ama ukulumó wuti haleralemó, hali *ais* kane kaae alée fóló dorowóo, simiró sameatamo hosekényóló dorowóo, yalepó. Atęyaleteiné hae kwia sore moletei betę siné dukuraalu, tamo hae kwia hęle muni felepó. Nirapekélé atétóro yalepó. Nerapeta, fea siné doló sukęlaa dalepó.

⁸ Téro, kale kolosale noma *ensel*-né ama ukulumó wuti haleralemó, doasi hasi fosó kaae ęla siné doló kuló di węi kęla tópaae taae deralepó. Atęyalemó, ai węi kęla sore maanetei, tamo hęle belene furaalu, betę samea alée felepó.

⁹ Węi kęla tuęmó sore betere ęla fake betę dóló sukunóturaalu tamo betepa taaralepo. Doasi węi tómó kotere nukukélé tamo mupa taalóturaalu betę fake doralepó.

¹⁰ Téro, doę noma *ensel*-né ama ukulumó wuti haleralemó, ęamó daale doasi hęre betę i haepaae si kaae dukulé dorowóló, doasi fole węiró ęmale węitamo tópaae dorowalepó. Atęyale tikimó, sore fake maanetei betę fake

doróturaalu, tamo taaralepó. ¹¹ Ai dorowale hęrené doita, Hakesąapó. Ai hakesąare węirape nale tikimó, mo dekeró so whį sisiraae felepó.

¹² Téro, kale dou *ensel*-né ama ukulumó wuti haleralemó, suka ke sore fake dęretei, betą fake dalemó dilikiyalepó. Hęrekélé, wéliékélé atétóro yalepó. Be dętamokélé tamo fake dępatei, betą fake dilikiyóo, dikitamokélé, tamo fake sawa dępatei, betą fake mo ti diliki yóo yalepó.

¹³ Téro, yąlo kaae tapatei, betą dukaa ó są tuąmó sę kutu bitu fo fakeyóló duraalu, “Kale hąle bitį fale sore *ensel*-né ukulumó wuti haletepa, i haemó betó mole so whįpaae sekęi ala waaiemó mo doasi, ‘Wió yae! Wió yae!’ I haemó betó mole so whįrape-ó, dią mo wió yae!” du betalepó.

9

¹ Téro, kale apo *ensel*-né ama ukulumó wuti haleralemó, take ó sąmó i haepaae tokó dorowale hęrepaae mo apaae derepale wosono dolo tų *ki* mené ąpaae matepa kelalepó. ² Téro, ai sekęné mo apaae derepale wosono dolo tukįyalemó, kutó néli bilitepa, hotere sukuli kaae sokalepó. Atéro holale sukuliné sukaró sątamo kinóló, be mo dilikiyalepó. ³ Téro ai sukuli dolomó, ero nusurape haepaae dorowalepó. Atimané whį tukó nukupa dotopo deretei, tų serekené tukó nukupa dere kaae yópóló, mené ą doasi fotokų melalepó. ⁴ Ai erorapepaae i fo yóló mulalepó. “I haemó yó mole nerape ó mepaae ere ęlarape ó nirape momókó doraęse. I hae kwiamó betere atima kutirimó Kótóné siri erénire so whį maaté tukó nae,” yóló mulalepó. ⁵ Ai ero nusupaae

melale fotokōta, so wh̄i mo ti sukópóló tukó néni, doasi dele sóró kaketu beterópóló, aporó wéliémó tuamó turukóló nukulé fu betae. Atétepa, dere dotopota, tō serekené tukó nukupa, dere kaae yaalopó. ⁶ Atétere sukamó, so wh̄i fea sukāaitere tū kekāalotei, sukutere ala kelaalomeipó. Atima mo ti sukunée deté fu betaalotei, ai tuamó sukutere ala mo muaalomeipó.

⁷ Téró, kale ero nusurape kelalemó, bōe dēle faairaaalu, *hos* hupurape donoróló biture kaae erepó. Atimané topomóta, kale tēteróló kaae tare doasiné deró betere *kold kapané* aleale topo tao kaae deróo, atimané kelepaakélé mo wh̄iné kelepa kaae daayóo erepó. ⁸ Téró kale ero nusurapéné topo nikikélé, sorapéné niki kaae daayóo, atimané sekékélé *laiyonné* seké kaae daayóo epa kelalepó. ⁹ Atimané bopémó yāle sene waqsóró, *aiyon kapa* wase kaae dakeró beterepó. Atima burā furaalu dere sépi haleta, *hos* hupuraperó atimané s̄yóló só kotere ɔlatamo bōe daai furaalu, dere diri fake hale kaae yalepó.

¹⁰ Atima disalené wh̄i tukó nukupa dere dotopota, tō serekené tukó nukupa dere kaae dapó. Atimané so wh̄i tukó nukuraalu, fē dée daalaterē dotopomó kaketé fu betepatei, wélié aporó kemeyaalopó. ¹¹ Atima tēteróló kaae tare topo wh̄ita, mo apaae derepale wosono dolomó betere *ensel* daalapó. Ai *ensel*-né ama doi Hibru foné Apadonipó. Krik foné Apoliyonipó.

¹² Folosóró waaire sekēmó, wió yae yale ala kemeyalepó. Tēpatei, tamo waai hāle mulapó.

¹³ Téró kale apomi *ensel*-né ama ukulumó wuti

haleralemó, Kótó betere felekemó *kold kapané* aleale momatere tiki kwia dokomó daaté fale sekérapemó sókó wale fota, mo whiné dere fo kaae depa wosalepó. ¹⁴ Atéro yale foné kale ukulumó wuti tare apomi *ensel-paae* duraału, “Kale doasi Yupretis fole wemó dokóló muló betere douro *ensel-rape* hąle fópóló sókó daalae,” yalepó. ¹⁵ Atima ai douro *ensel-rape*ta, ba fomókélé, wéliémókélé, be demókélé, sukakelemókélé, mo tukóló mulóló donoró betere be demótóro i hae kwiamó betó mole so whi sore fake beteretei, betą fake dópóló dotonalepó. ¹⁶ Atéro, bóe daai kale *hos* hupu tómó betóló fele whirape fea, dokų sóró touróturaalu, 200 *million*-pó (200,000,000) depa wosalepó.

¹⁷ Yąło nokenaró dere kaaené i ala epa kelalepó. Kale *hos* hupu tómó betó mole whirape atima bopémó sere bóe wase mo si kele kaae sonaa yóo, mepaae sukutą yóo, mepaae ti *sulpa* kaae, whé yóo, erepó. Ai *hos* hupuné topota, mo *laiyonné* topo kaae daalepó. Ai hupurapené kólómó, simiró sukulitamókélé, si dokole kane *sulpa-kélé* atimané kólómó sókó walepó. ¹⁸ Ai sore ąlarape atimané kólómó sókó wouraalu, i haemó betó mole so whi sore fake beteretei tamo taaróló, betą fake dóló kemeralepó. ¹⁹ Ai *hos* hupurape atimané fotokąta, kólóro disaletamomó bulapó. Atimané disalerape mo wuli tiki kaae daalu, ama disale kwiamó topo daalapó. Ainé so whi tukó nukupa, doasi dele sua dapó.

²⁰ Kale whi dele ąlané dóló mepaae taarale so whi atima naasené aleale kapala kótópaae

tuę tiki tiratere ala taaréni, hąle yó tarepó. Ti ai kapala kótórapeta, *kold kapanékélé, silpa kapakélé, brons kapanékélé*, mo kaponékélé, ninékélé, aleyóló daaló betepatei, atima kotere ala ó, wosetere ala ó, keletere alamo dumipó. ²¹ Atimané whį dele alakélé, kae kae hosó fokélé, nópu nokole alakélé, ọlémi nokole alakélé fea taaróló kisipa feteni, hąle yó tarepó.

10

Asęre sóku belekąa male doasi fotokọ bole ensel-né dąae faróló tare fo

¹ Téro, me doasi fotokọ bole *ensel* hepen be taaróló, i haepaae dorowou betepa yąlo kelalepó. Ai sekéné ama kutita, mo sąkotóro deróo, ama topo tó sikimó sikipa dou filipaa yóo, ama kelepaakélé, mo suka dę kaae yóo, ama hąleke tamokélé, doasi ni tikimó si dukutere kaae dó tawóo erepó. ² Ai sekéné ama naasené belekąamale asęre sóku dąae faróló tarepó. Ama turu hąleke doasi węi kęla tómó daalóo, fę hąleke hae tómó daalóo epa kelalepó. ³ Atéru, ai sekéné ama dere fo faketa, *laiyon-né* keterę kaae yalepó. Ama atéro fo faketeremó, węikeró be sapalaané whįné fo kaae depa wosalepó. ⁴ Atéro węikeró be sapalaané yale fọ yąlo asę yaai yalemó, ó hepen bemó sókó wale foné duraalu, “Kale węikeró be sapalaané yale fo asęni kinae,” yalepó.

⁵ Take me hąleke węi kęla tómó daalóo, me hąleke hae tómó daalóo, epa kelale *ensel-né* ama turu naase ó hepen-paae horó beterepó. ⁶ Atéru, sąró hepen-tamokélé, haekélé, węi kęlakélé, ai

sore tikimó ere ala ó mole ɔlatamo, fea aleyale mo ti betó tare Talené doi yóló malotu duraalu, “Kaae taté fole ala momó kae yaalomeipó. ⁷ Tépaitei, nalo kale węike *ensel*-né ama ukulumó wuti hale yaaire be de teópa kae taru, i ala yaalopó. Kótóné kinóló mole ala i ape yóló ama kutó diratere kóló whįrapepaae deté wale fo dokonóturaalu, mo eróló kemeraalopó,” yalepó.

⁸ Téró, take hepen bemó sókó wapa wosale fonéitei ępaae momó duraalu, “Kale węi kęlaró haetamomó hó daaló betere *ensel*-né dęae faróló tare asęre sóku sene fae,” yalepó.

⁹ Atétepa, ę kale *ensel* daalepaae fóló, naao ai tare asęre sóku kwia sawakó ęmale melaaloé yóló wosalepó. Tétepa ępaae duraalu, “Tao sóró nae. Atéró nukupa, naao kólómóta, meke fe felé kae yaalotei, depe tuąmó feléni doyaalopó,” yalepó. ¹⁰ Atétepa, kale asęre sóku sawatamo ama naasené tapa, yąlo tao sóró nalemó, kólómó meke fe felé kae yaletai, depe tuąpaae bitį durupuraalu, yąlo depe mo doyalepó. ¹¹ Téró, ępaae duraalu, “Kae kae tiki daale so whįkélé, kae kae *Gavman*-né teęteróló kae tare so whįpaaekélé, kae kae be fo buó mole so whįpaaekélé, kae kae teęteróló kae tare topo whįrapepaaekélé, mo so whįpaaekélé, Kótóné eraaire ala i ape yóló, momó yó melae,” yalepó.

11

Kótóné yaaire ala i ape yóló yó matere whį tamoné yale ala

¹ Téro, ðale sere ɔla kaae, kape siki mené ɛpaae melólo duraalu, “Ya fólo, Kótópaae momatere beró Talepaae simó sukúlaa ðalaterē tikitamo ðale sene fae. Téturaalu, ai be tuamó touróló bitu, Kótóné doi sóró horótu betere so whikélé dokɔ sae,” yalepó. ² Tépatei, kale momatere be bolaare tipi tuɔ betɔ ðale saɔse. Ti noatepae, ai belata, Juda meire fake so whimó meló betereteinépó. Kótóné ama mo kae tene be hulua wisinaale Juda meire fakené folokoleróló, hɔko kutu betepatei, 42 wélié kemeyaalopó. ³ Téro, yaɔo du betere ala yó matere whi tamo yaɔo fotokɔ matepa, atimaamo dekemó deratere yei kuti deróló, Kótóné ðiɔpaae dere fo i ape, yóló yó maté kutu betepa, 1,260 be ðerape kemeyaalopó. ⁴ Ti ai seké tamota, i hae kwia fea teteróló kaae tare Tale betere felekemó daale *Olip* ni tamo kaae daayóo, sa diri tamo kaae daayóo erapó. ⁵ Mepaae whi denétamo atimaamo doraai du betepa, ti atimaamoné kólómó sókó wale siné atima dó sóró mo ti aluraalopó. Mepaae whi dené ai seké tamo doraai kisipa mutepa, ti atimané ai dere alamó atimatei sukɔalo ai ape. ⁶ Kale seké tamoné bole fotokɔ etérópó. Kótóné atimaamopaae dere fo mo so whipaae yó matere be ðemó, hali waɔsóró kinaaire fotokɔkélé sumó bolepó. I haemó belere weikélé samea alée falóo, yaaire fotokɔkélé sumó buóo, erépó. I haemó betó mole so whipaae kae kae dowi sekéi alarape atimaamoné hekesere be ðemó sumó eranérapó.

⁷ Atimaamoné kelale ala yó maté fólo kemerateremó, mo a dolopaae derepale wosono

dolomó betere dowi syaae kaae ąła sókó huturaalu, bóe dóló atimaamo tẹteróló mo ti sukópóló daalo ai ape. ⁸ Téro, ai sekẹ tamoné tiki doasi doi mole be hulua tų hąkeamó muaalopó. Ai be huluamótóró atimaamo tẹteróló kaae tare Tale filipaa ni tómó oleróló dalepó. Ai be huluapaae dó faróló, Sodom beró Isip haetamo kaaepó. ⁹ Atimaamoné tiki atéro hąle mupa, kae kae tiki daale so whjnékélé, kae kae fake so whjkélé, kae kae be fo bole so whjnékélé, kae kae *Gavman*-né tẹteróló kaae tare so whjnékélé, sore be dẹ kemeyóló dou be dẹné suka tuąmó kẹleta yópólópa दौरaąse. ¹⁰ I hae kwia feamó betóló fale so whjné duraalu, “Atimaamo Kótóné kóló whj bitu, dą dóló susupurótu betale sekẹ tamo ti mulapa kelae yóló doka doka yaalopó. Téturaalu mo kée yóló, atimasisi wisi wisi ąła u mótu i mótu du betaalopó,” yalepó.

¹¹ Tétu betaalotei, sore be dẹ kemeyóló dou be dẹné suka tuąmó daapa, Kótó betemó sókó wale fomo atimaamoné tiki tuąpaae bitj derepaalopó. Téturaalu, kale sekẹ tamo turukó holóló daane hotere kilitu, kale so whj atima winé sukóló diri furu furu yalepó. ¹² Atéro turukó holóló daapa, ó hepen bemó atimaamopaae fo fake yóló duraalu, “Ipaae holae!” deremó, atimaamoné bóe whjrapené kaae dilikiyó mupatei, hepen-paae huturaalu, sąko dolomó buó deyalepó.

¹³ Até yale sukakelemótóró doasi bao duraalu, naase tamo be hulua eretei betą kolokó doropuraalu, aporó kemeyóló, me naase दौरó be hulua fake hąle erepó. Ai bao yaleteiné be kąaturaalu,

doló kemerale so whį fea dokọ sóró touróturaalu 7,000 so whįpó. Até deremó, dini hąsóko fele so whį atima winé sukutu, ó hepen bemó betere Kótó mo daalapóló doi sóró horótu betalepó.

¹⁴ Kale kolosale noma wió yae yale sekę wóló kemeyaletei, doų noma wió yae yale sekę betą mo felekemó waalo ai ape.

Węike dakeróló ukulumó wuti hale yaletei

¹⁵ Téró, kale węike *ensel*-né ama ukulumó wuti haleralemó, ó hepen bemó atimané doasi fo fakeyóló duraalu,

“Take i hae mené tęteróló kaae taretei, fasó sóró mió dą tęteróló kaae tare Taleró ama so whį tęteróló kaae tare whį Kerisotamoné tęteróló kaae tarapó.

Ai sekęné ama kaae tare ala kemeni, hąle yó tawaalopó,” yalepó.

¹⁶⁻¹⁷ Téró Kótó felekemó betere 24 whį disir-ape, atima tęteróló kaae taru betere *sea* taaróló, haemó deraapisa fóló mulu Kótóné doi sóró horóló duraalu,

“Mo doasi fotokọ bole Tale Kótóo, yąta take bitiré wóló, miókélé hąle betereteiné dąné yąpaae mo kée dapó.

Ti noatepae, naao doasi bole fotokęné tęteróló kaae tare ala kaae salepó.

¹⁸ I hae kwia feamó betó mole so whįné fopaae butu betepa, naao fopaae bole ala sóko walepó.

Sukąle so whįkélé, naao kutó diratere kóló whįrapekélé, naao kae beteró betere so whįkélé, yąpaae wiyóló naao doi sóró

horótu betere so whjkélé, mepaae doi munire so whj ó doi mole so whj fea tale yóló kwia melaaire be de sókó wóló i mole ape. Ai be demótóro i hae dorótu betere so whjkélé kwia melóló, doraalopó,” yalepó.

¹⁹ Atéyale kılipaae Kótóné hepen-mó tene momatere be tu tukwę fóló molepó. Atépa kelalemó, ai be tuámó ama so whj tao saalopóló, mo dirii fo aseýóló muló betere *bokis* molepó. Téro, epée fitąa yóo, be są kili kili yóo, doasi sapalaa dorowóo, bao doasi yóo, *ais* kaporó doasi besé tikitamo dorowóo yalepó.

12

Dowi wuli disóro betą sotamoné yale ala

¹ Mo doasi bete mole ala yaaiemó, me alapaae dó faróló hepen-mó epa kelale ala wisinaale i ape. Betą soné ama deró betere kutita, ti mo sukatóroti deróo, ama hó aqmó wélié daayóo, 12 hęrerape ama topo tao deróo, epa kelalepó. ² Téro kale soné ama ere naale ęlumétepa saairaalu, kakóló sisó nuku beterepó. ³ Téro kale dere kaae, hepen-mó me alapaae dó faaróló depa kelaleteti me i ape. Sonaai wuli doasi disó kaae betepa kelalepó. Ama topo weikeró daayóo, sekę naase tamo daayóo, weikeró toporapemó doasi teteróló kaae tare topo whjné deratere topo tao kaae deróo, yó molepó. ⁴ Ai sekéné ama disale fépo yaletikimó, sąmó daae mole hęrerape tamo fake hąle daapatei, betą fake haepaae torokó dorowalepó. Atéro, kale soné ere naale seretamótóro tao sóro nó deraairaalu, mo felekemó melaa yóló beterepó. ⁵ Atépatei, kale

soné naale só mulalepó. Ai naalenéta, *aiyon kapa* fake nópulu tawóló daalu, i hae kwia kae kaemó betóló fale so whį ama tẹteróló kaae tawaalopó. Kale soné ama naale seretamotóróti mo hapale Kótóné tao sóró ama tẹteróló kaae tare doasi betere tikimó ątamó betąmó titiyóló beteralepó. ⁶ Téro kale so ą whįkélé bitini, hąle wópu mole haepaae botokó felepó. Ai haeta, kale so ą naale detepa, 1,260 be dę tuąmó mené ą wisiyóló kaae tawópoló, Kótóné tukóló mulale tikipó.

⁷ Atéro, ó hepen bemó doakale bóe du betalepó. Maikel-né ama *ensel*-rape ipaae kąayóo, kale disó kaae wuliné ama *ensel*-rape upaae kąayóo, yóló bóe du betalepó. ⁸ Téyaleteti, Maikel-ró ama *ensel*-rapetamoné fotokóné kale disó kaae wuliró ama *ensel*-rapetamo doló tẹteróló hepen-mó betere alakélé mo ti kemeralepó. ⁹ Atéro, kale disó kaae wuli i haepaae sóró taae deralepó. Ai wulita, mo taketi bitiré walepó. Ama doita, bóe dele dowi kepe ó Satan-pó. Ai sekénétóro, i hae kwia feamó betó mole so whį, dowi tųpaae ąlisóro fu beterepó. Ai sekéro ama *ensel*-rapetamo i haepaae taae deralepó.

¹⁰ Téro, hepen bemó etei fo fakeyóló depa wosalepó.

“Dą tẹteróló kaae tare Kótóné tao sere alakélé, fotokó bole alakélé, ama so whį tẹteróló kaae tare alakélé, ama sóró betéro betere whį Kerisoné tẹteróló kaae tare alakélé, mió wóló mulapó.

Ti noatepae, betere dokọ Kótóné keletómó dąné ne norape dętamokélé, dikitamokélé

só derótu betere seké ąkélé sóró taae deró beteropó.

¹¹ Kale *Sipsip* hupu malené samearó Talené atimané betere bete tuąpaae erótu betere alatamo hąkeamó yó mótu betalepó.

Atétu beteremó, atima dupakélé wiyóló taaréni, Kótóné ala betą hąle eraté fu betaleteiné, ne norapetamo bóe du betale seké mo ti dóló tẹteralepó.

¹² Atéremó, hepen be tuąmó betó mole whį dią mo kée yóló hajné sinitu betae.

Tépatei, ą hepen be taaróló diątamo haepaae bitį dorowaleteiné dią haemó betó mole so whįró doasi wẹi kẹla tuąmó betere so whįtamo dią fea ‘Wió fo du betae!’

Ti noatepae, ai sekéné ama yaaire ala doa be demó yaalo meipóló kisipa mutu, ą doasi fopaae butapó,” yalepó.

¹³ Kale dowi disó kaae wuli ą i haepaae sóró taae deró betepa kisipa mutu, kale naale deale so daai sya felepó. ¹⁴ Ai so ą bitį fópóló, Talené taketi donoróló muló betere whįkélé bitini, hąle wópu mole tikipaae sẹ fópóló, doakale dukaané baase tamo ą melalepó. Atéro fóló betepa, wuliné ą me ala yaqsóró mepaae whįrapené ą mo wisiyóló kaae taté fóló, ba fo sorené dou ba fo tuąmó tukóló kemeróppóló malepó. ¹⁵ Kale so atéro fupa, ą só fópóló dowi wuliné ama kólómó doasi fotokọi wẹi tiki siriyó analepó. ¹⁶ Atéyalemó, kale so tao suraalu, haenétei kóló hąsóró holóló, ai wẹi tiki nó deralepó. ¹⁷ Atéteremó, disóné kale sotamo mo doakale fopaae buturaalu, ai soné

ama mepaae naale senaaletamo bóe daai felepó. Ti aita, Kótóné ama yae yóló muló betere foró, Yesuné ama yale alatamo mopóló erótu betere naale senaaletamopó. ¹⁸Téró, kale disó kaae wuli ą fóló, węi fókumó daalepó.

13

Doasi węi kęla tuąmó sókó holale syaae kaae ęla

¹ Téró ai węi kęla tuąmó syaae kaae ęla sókó hotepa kelalemó, topo węikeró daayóo, sekęrapekélé naase tamo daayóo, erepó. Ai sekęrape tómó tęteróló kaae tare doasiné der- atere topo taorape deró beterepó. Ai toporape dokómó Kótó faletere doirape aseýóló dakerótua yó molepó. ² Ai syaae kaae ęlata, mo *leapat* kaae aęrutei, ama hęleke ti *beané* hęleke kaae daayóo, kęlókéle, *laiyonné* kęló kaae daayóo erepó. Téró, kale wuli disóné fotokękélé, ama tęteróló kaae tare alakélé, fea ala yópóló, sóró betero betere alakélé, ai kale węimó sókó holale ęlapaae malepó. ³ Ai kale syaae kaae ęlané toporapekó betąmó, mo ti sukunei tę daayaletci, momó duniyale siri mupa kelalepó. Atére ala kilitu i hae kwia feamó betó mole so whę feané “Haió” yóló siraturaalu, kale syaae kaae ęlané ama dere alapaae tuę tiki tiróló sya felepó. ⁴ Ai kale disó kaae wuliné kale syaae kaae ęlané doasi fotokęi ala yópóló sóró daalatero ala kolóló, so whę feané ai kale disó kilituraalu, “Ąta mo doa Taletóro,” hętipó yóló, atima ą daale aęmó sukóló bituraalu, ama doi hale horalepó. Atétu

yale kaae, “I kale węimó sókó horale syaae kaae ęlatamo de sųre? Aųamo mené bóe dele alakélé mo enénipó,” yóló dukirótu betalepó.

⁵ Téró, ai kale syaae kaae ęlané bopé fake dere fokélé, Kótó faletere fokélé, so whį tęteróló kaae tare alakélé, yópoló mené ą fotokę sųmó melalepó. Ai sekę ą ai ala yópoló sóró beter-atepa, eraté fu bituraalu, 42 wélié tuųmó eróló kemerópóló tę melalepó. ⁶ Ama ęlómó dere foné Kótó eratere fokélé, Kótóné doi hęko eróló faletere fokélé, Kótóné ama hepen bemó ątamo betere whįrape faletere forapekélé du betalepó. ⁷ Téturaalu, Kótóné atima dowi ala kemeróló kae beteró betere so whįtamo bóe daairaalu, ketekeę buló só deraaitępa seséni, ama yaaire ala betą yópoló taalalepó. Kae kae fakekélé, kae kae tiki daae mole so whįkélé, kae kae be fo bole so whįkélé, tęteróló kaae dilikiyó mole hae kwia-rapekélé, mo fea ama tęteróló kaae tanópóló mené ąpaae fotokę malepó. ⁸ I hae kwia feamó betó mole so whįné, kale syaae kaae ęla aųmó sukóló bitu, “Yaąa Talepó,” du betaalo ai ape. Ti atimata, kale *sipsip* hupu malené mo ti betó tare *buk*-mó doi asęnire so whįpó. Ti ai *Sipsip* hupu maleta, i hae kwia keké naaipatei, dępólópó yóló muló betere hupu malepó. ⁹ Mępaae whį de woséli daapata, ti i dere fo wosóló tuę muępóló yae.

¹⁰ Whį me detamo bóe duraalu, wae sóró *dipula* beteraalópóló tukóló muló betępa, ti mo atétóró yaalopó.

Whį me de bóe whįné bóe dele sepakené dępólópó yóló muló betępa, ti mo sepak-

enétóró daalopó.

Até yaairemó, Kótóné kae beteró betere so whįpaae sekęi alarape wapakélé, haepaae derepéni, diriyóló bitu, Talené ama ala betą ketekę buóló eró tawae.

Hae tuąmó sókó holale syaae kaae ąla

¹¹ Téro ąąlo kelalemó, hae dolomó syaae kaae ąla me sókó horalepó. Ai sekęné ama topomóta, *Sipsip* hupu malené sekę kaae daalutei, ama dere fo wosalemó, kale wuli disóné fo kaae yalepó.

¹² Kale haemó sókó horale syaae kaae ąlapaae folosóró węimó sókó horale sekęné ama tęteróló kaae tare ala melalepó. Atétepa, nalo wale sekęné ama tęteróló kaae taru, kale folosóró wale sekęné doi eróturaalu, i haemó betó mole so whį feané kale sukętei tokóló doasi siri mole sekępaae Tale-ó, yóló doi sóró horópoló sętu betalepó. ¹³ Ai kale sekęné amatei mo doakale kae kae kelemei alarape eróturaalu, so whį feané keletómó sikélé ó hepen be taaróló i haepaae dorowópoló erótua yalepó. ¹⁴ Kale folosóró wale sekęné doi doasi mulópoló mené ą fotoką sųmó matepa, kae kae kelemei alarape erótu betalepó. Téturaalu, i hae kwiamó betó mole so whį fea dilikóló kópaee falatua yalepó. Téro, kale haemó sókó holale sekęné i haemó betó mole so whįpaae duraalu, sepake daayale tikimó doasi siri mole sekęné ama doi doasi muópoló, ama aso sųróló aleale ąla daalae, yóló mulalepó. ¹⁵ Téro, kale folosóró wale sekę sųróló aleale ąlané fo yópoló, fomo bulaaire fotoką mené haeró sókó holale sekępaae malepó. Atépa, i hae kwiamó betó mole so whįné

ai asopaae, Tale-ó yóló doi sóró horénitere so whį dǫpóló, haemó sókó horale sekéné fotokǫ sımó bulalepó. ¹⁶ Ai sekéné, doasi doi mole whį ó doi munire whįpaaekélé, néli whį ó yoleale whįpaaekélé, hąle kǫleaané betó mole whį ó wae sóró kutó diratere whįpaaekélé, atimané turu naasemó ó kutirimó siri erǫpóló yae yóló so whį feapaae sęyalepó. ¹⁷ Ai siritamo munipa, ti ǫla dupu dere alakélé, ó dotonatere alakélé, mo yaalo meipó. Ti ai sirita, kale syaae kaae ǫlané ama doi ó ama doipaae fó faróló ere *nambapó*.

¹⁸ Ti etei alata, mo hąle whįné tuęyaalo meitei, mo tuę tiki fosó fosó yóló dotoróę fale whįné betą sımó taleyóló bete tuęnérapó. Whį me detamo, ama tuę tiki fosópa, ti kale syaae kaae ǫlané *namba* taleyóló bete tuęnérapó. Ti ai *nambata*, mo whįné *namba*-pó. Ai sekéné ama *nambata* 666-pó.

14

Sipsip hupu maleró 144,000 so whįrapetamoné yale ala

¹ Téro yąlo kelalemó, ę daale felekepaae anóló Saion hasi fosómó kale *Sipsip* hupu male daapa kelalepó. Aimó 144,000 whįrapekélé, atima betámó daae molepó. Ai whįrape atimané kutirimóta, kale hupu malené doikélé, Alimané doikélé aseýóló dakeró beterepó. ² Téro yąlo wosalemó, hepen bemó sókó wale haleta, węi doų kąatu dere hu kaaeró be sapalaa dorowale hale kaaetamo depa wosalepó. Meta, *kita* kaae ǫlarapené dere hale kaae depa wosalepó.

³ Téro, u kale whįrape atimané kale tẹteróló kaae tare doasi betere tikipaaekélé, ą bopéróló betó mole doųró betere ọlarapepaaekélé, whį disirapepaaekélé, kese anóló daae muluraalu, kae kisi wole fo du betalepó. Ai wole fota, ąle mo whįné tuę yóló enénipó. I haemó dowi kwia saqsóró Kótóné tao sóró dupurale 144,000 whįrapené betą tuę yóló enérápó. ⁴ Ti ai daae mole whįrapeta, sorapetamo folokolei ala initu detere kaae, i haemó mole alatamo hosekénire whįrapepó. Ti noatepae, atimané betere ala folokole yaqsóró ó me alatamo hoseké yaqsóró mo hotowayóló kaae tawaleteinépó. Ti ai whįrapeta, *Sipsip* hupu malené dere ala sya fóló erótu beterápó. Ai whįrape atimata, ąle mo so whį kuamó betó mupa, dupuróló Kótóró *Sipsip* hupu maletamopaae kale kutómó folosóró ọlumé dere ọla, Talepaae ąle matere kaae yóló melale 144,000 whįrapepó. ⁵ Atimata, kapala fo sawakélé muniru, me ąsókó fole alakélé inire whįrapepó.

Sore ensel-rapéné yale ala

⁶ Téro ọlo kelalemó, *ensel* me kae ó sąmó sé kutu betepa kelalepó. Ai sekénéta, mo titóroti ąle betó tawaaire kisi fo wisi, i hae kwia feamó betó mole so whįpaae yó melaairaaalu, tarepó. Ti ai fota, betą fake so whįpaae maaté yó melaai mei, kae kae *Gavman*-né tẹteróló kaae tare so whįpaaekélé, kae kae fake so whįpaaekélé, kae kae be fo bole so whįpaaekélé, kae kae tiki daae mole so whįrapepaaekélé, yó melaaire fo wisipó. ⁷ Téro ama fo fake yóló duraalu, “Kótópaae winé

sukuturaalu, ama doi betą doasi doi muóπόló erae. Ti noatepae, ama fo tokótamo yóló tale-turaalu, kwia melaaire suka kele i sókó wale ape. Téraπα, ą aómó sukóló bituraalu, ‘Aya Tale doasi-ó,’ yóló, ama doi betą sóró horótu betae. Ti amata, hepen beró sątamokélé, haekélé, doasi węi kęlakélé, fole węirapekélé aleyóló muló betereteinépó,” yalepó.

⁸ Ai fo yale *ensel* folosóró fi tikimó, *ensel* me kae nalo sya fu bitu duraalu, “Kolokóló dorowóló a mole ape. Doakale doi mole Babilon be hulua kolokóló dorowóló mulapó. Ti ai nópu nokole so Babilon-néta, ama nópu nokole alané aleale keyaa fole *wain* węi hae kwia kae kaemó betó mole so whį feané nópóló melótua yale so, mió kolokó dorowóló ai mole ape,” yalepó.

⁹⁻¹⁰ Téro kale dere kaae, ai *ensel*-tamo fi tikimó, *ensel* me kae sya fu fo fakeyóló duraalu, “Mepaae whį detamo, kale syaae kaae ęlapaae ó ama aso kaae ęlapaae, ‘Doa Tale-ó,’ yóló aómó sukóló bitu, atima kutirimó ó naasemó, ai ęlané siri eró betere whįrape ama doakale fopaae buló kwia matere węi nópóló melaalo ai ape. Ai *wain* węi mo węitamo hoseké ini, mo *wain* węitóró Kótóné fopaae butu kwia melaairetei, wutimó tepeyóló mulapó. ¹¹ Atéro atima duku bituraalu, hotu betere sukulita, mo hąle holótóró tawaalopó. So whį de kale syaae kae ęlaró ama aso kaae ęlatamoné, doi sóró horóó, ama doi mole siri sóó, ere so whį atima dętamo ó dilikitamokélé, sąa nóló betere ala mo yaalomeipó,” yalepó. ¹² Kótóné kae betéro betere so whįné, ama yae

yóló muló betere fo aqómó sukóló bitu, Yesuné ala eraté fu betaalopó. Ai tuqámó i kale bope yale sekei alarape wapakélé, haepaae doropóló taaréni, hąle beleté fu betereteiné ai ala mo sumó eranérápó.

¹³ Téró, hepen bemó i fo depa ąalo wosalepó. “I fo asęyae. Mo mió kaae sóró Taletamo betqámó betere so whį sukutepa, ti atima Talené mo wisiró beterapó,” yalepó. Kale Deį Kepe Wisiné duraalu, “Mo dapó. Ti atimané depe tukó wei ala du beteretei taaróló, sęa nóló bituraalu, atimané yale alamó dupu saaire ala felekemó yaalo ai ape,” yalepó.

Haemó yó mole ąla ąlumétepa turukóló saairetei

¹⁴ Téró ąalo kelalemó, ę daalepaae anóló mo deį sąko tómó, whįné naalema kaae betepa kelalepó. Ama topomó, tęteróló kaae tare doasiné deró betere *kold kapané* aleale topo tao deró bituraalu, ama naasené ąla ąlumétepa turukó suatere hekemée wei fosói sepake tarepó. ¹⁵ Tépa, me *ensel* momatere bemó sókó wóló, kale sąko tómó betere sekępaae fo fakeyóló duraalu, “Naaó tare sepakené kale ąlumére ąlarape turukóló sae. Ti noatepae, mió ąla ąlumépa saaire be deį i sókó wale ape,” yalepó. ¹⁶ Tétepa, kale sekęné tare sepakené i haemó ąlumé yó mole ąlarape fea felesé yóló turukó salepó.

¹⁷ Téró, me *ensel*-nékélé, hekemée wei sepake fosói tawóló, hepen-mó tęne momatere bemó sókó walepó. ¹⁸ Atépa, Talepaae matere ąla sukųlaa dalatere tikimó si kaae tare *ensel* sókó

wóló, kale sepake tare *ensel*-paae fo fakeyóló duraalu, “Naao ai tare sepake fosóné i haemó yó mole *wain* képi durape ɥlumérapa, sepemó tukóló siré kwęae,” yalepó. ¹⁹ Tétepa, kale *ensel*-né ama sepakené i haemó yó mole *wain* képi du felesé yóló turukó siré kwęyóló, kale képi du dętere doasi tikipaae taae derale fae. Ti kale képi du dętere tikita, Kótóné ama fopaae bole ala kwia melaairaaalu, dętu betere tikipó. ²⁰ Doasi be hulua aqró *wain* węi dętere tikipaae taae deratepa, atimané tejiya tejiya yaletikimó, samea doasi sókó felepó. Atéro sókó fele sameata, węi kaae dukulé holóló, *hos* hupuné ąło aqmó depa sale dąleta, 300 kilomita sypó.

15

Węikeró ensel-rapené węikeró doasi sekeji alarape tapa kelaletai

¹ Téro ąło kelalemó, hepen bemó mo doasi bete mole ala wisinaale yaaiemó dere ala epa kelalepó. Ai kale kelale alata, i ape. Węikeró *ensel*-rape dokę mo kemeróturaalu so whę feapaae dowi sekeji ala melaaire węikeró tapa kelalepó. Ai kemeróturaalu dere fota, ti Kótóné ama fopaae buóló kwia melaaire alarape mo ti kemeróturaalu, i węikeró alarapené kemeraalopó. ² Téro ąło kelalemó, *klas*-ró sitamo hosekéróló aleale węi kęła kaae belerepó. Ai węi fóku dęmóta, so whę mo fea hąle ąła kaae daae mupa kelalepó. Ti aimó daae mole so whęta, kale syaae kaae ąlaró ą sųróló aleale asotamokélé, ama doimó sere *namba*-kélé, ai alarapetamo bóe dóló

tęteróló wale so whįpó. ³ Kótóné ai daae mole so whįpaae male *kita* kaae ęlarape taruraalu, Kótóné kutó diratere whį Moses-ró kale *Sipsip* hupu maletamo doląanóló du betale wole fo i ape. “Mo doasi fotokę bole Tale Kótóo, naao du betere alata, mo doasi sira yaai dere ala du beterapó.

Take keké nale alimó kaae sóró bitiré waletciakélé, mió i alimó bitiré faaireteikélé, tęteróló kaae tare Tale-ó, yęta, naao ere alatóró sya furaalu, mo dono taletu beterapó.

⁴ Tale-ó, whį me de yępaae winé sukutu, naao ere alamó naao doi doasi muaalomeipóló de? Betę whįkélé yę kaae bitini, yęta dowi alakélé muni, mo kae betere Talepó.

Kae kae hae kwiamó betó mole so whį yę beterepaae wóló, yę aęmó sukóló bitu, Doa Tale-ó yóló dukirótu betaalo ai ape.

Ti noatepae, naao mo donoyóló taletu betere alarape take hiróló mualetci, mió so whį feané kolópoló hąkeamó muló beterapó,” yalepó.

⁵ Ai alarape yóló kemetepa kelalemó, ó hepenmó momatere be tų tukwę fóló molepó. Ai momatere beta, Kótóné ama so whį tao saalopóló dirii fo muló betere kuti bepó. ⁶ Téro kelalemó, kale węikeró *ensel*-rape atimané węikeró sekęi alarape tawóló ai momatere bemó sókó walepó. Atimané deró betere kutita, mo dę tekée fóló kasa kasai *linen* kuti deróo, *kold kapané* dokale to atimané deró betere kuti tęteróló bopemó sóo, epa kelalepó. ⁷ Téro, kale douró betere

qlarapekó betané kale węikeró *ensel*-rapepaae *kold kapané* aleale węikeró okopoi nukurape dokęralepó. Ai nukurapemó, mo ti betó tare Kótóné ama kwia melaaire fopaae butere ala fąayóló molepó. ⁸ Kótóné ama ere ala wisinaale hąkearatere alaró ama doasi fotokętamonné momatere be dolomó sukuli kaaróló fąaneteiné, whį fókélé mo enénipó. Kale węikeró *ensel*-rapené tare węikeró dowi seķęi alarape melóló kemenipatei, ai be dolopaae folo hapale honénipó.

16

Kótóné fopaae bole ala belere okopoi nukurape

¹ Téró yąlo wosalemó, momatere bemó sókó wale foné kale węikeró *ensel*-rapepaae fo fakeyóló duraalu, “Kótóné fopaae buluraalu kwia melaaire ala okopoi nukumó beleróló diaaę ai taretei, haepaae sunée derąle fae,” yalepó.

² Ai fo depa, kale kolosale *ensel* fóló ama tare okopoi nukumó belere ęla sóró fóló, haepaae sunée deralemó, kale syaae kaae ęlané siri eróló, ama aso aęmó sukóló betó mole so whįné tikimó, dotopo yóló mo doasi dele su betaaire sonaalei humu fulu deralepó.

³ Téró kolosale noma *ensel*-né ama tare okopoi nukumó belere ęla doasi węi kęlapaae sunée deralemó, kale węi mo sameatóró alée felepó. Ai sameata, mo ti sukąle whįné samea kaae hękoloipó. Até yaletikimó, węi kęla tuęmó betó mole ęlaraperó ere ęlarapetamo mo fea sisiraae felepó.

4 Téro, kale dou noma *ensel*-né ama tare okopoi nukumó belere ąla, doasi fole węiró ąmale węirapetamopaae sunée deralemó, samea alée felepó. 5 Téro ąło wosalemó, kale doasi fole węirape kaae tare *ensel*-né duraalu,

“Naao taletere alata, mo donotóró tale yóló kwia materetei mo wisirapó.

Ti noatepae, ąta takekélé betóo, miókélé betóo iru, dowi ala mo betąkélé munire Tale beterapó.

Téru, fo tokótamo yóló tale yóló kwia matere alata, mo donoyólótóróti ai yale ape.

6 Ti noatepae, naao kae beteró betere so whıró naao fo eratere ąló whırapetamo dale kwia tokó móturaalu ai sókó fele samea nópóló materetei, mo donorapó,” yalepó.

7 Téro ąło wosalemó, Talepaae moma yóló simó sukųlaa dalatere tikimó etei fo yalepó.

“Mo doakale fotokų bole Tale Kótó-ó, ąta mo fotóró bulu, naao tale yóló kwia matere alakélé mo donotóró dapó,” yalepó.

8 Téro, kale dou *ensel*-né ama tare okopoi nukumó belere ąla suka betepaae sunée deralemó, siné so whı dolo baalu sorokó faaire fotokų mené sumó melalepó. 9 Atéro dokole si supuné atima tiki turó baalu sorokó felepó. Até dere supumó, Kótóné doi doróló ą eratere fo du beterepó. Atimapaae atei kaae susupui ala eratepatei, atimané du betere dowi ala taaróló, tuę tiki fetenipó. Téruraalu, Kótóné doi doasi muópóló eraaire alakélé hýyóló, dowąae fu betalepó.

¹⁰ Kale apo *ensel*-né ama tare okopoi nukumó belere ęła, kale syaae kaae ęlané tętteróló kaae tare tikimó sunée deralemó, ai hae kwia fea dilikiyó felepó. So whį supumó atéró kakutu bitu, atimané hapetei turukóló nuku betalepó.

¹¹ Atimané tikimó daae mole humu dotoporó siné dale deteraatamomó kakutu bituraalu, hepen bemó betere Kótóné doi doróló, tekani fo du betalepó. Tétu, atimané yale dowi ala taaróló tuę tiki feteyóló betaalo hęyóló, dowi ala yaaitei dowęae fu betalepó.

¹² Kale apomi *ensel*-né ama tare okopoi nukumó belere ęła doasi fole Yupretis węipaae sunée deralemó, kale suka hoterepaaeróló tętteróló kaae dilikiyó mole topo whįrape waaire tų mulóturaalu, kale węi tiki dikęlepó. ¹³ Téro yęło kelalemó, sore dowi keperape sepęerape kaae beterepó. Ai dowi kepe atima, me wuli disóné kęłómó sókó wóo, me syaae kaae ęlané kęłómó sókó wóo, me Kótóné fopóló kapala fo yó matere whįné kęłómó sókó wóo, yalepó. ¹⁴ Ti ai keperapeta, kae kae kelemei alarape erótu betere sekęrapepó. Doa fotokę bole Tale Kótóné ama tukóló muló betere doasi be dęmó, Taletamo bóe daaire whįrape mei yaęsóró, i hae kwia feamó tętteróló kaae dilikiyó mole topo whįrapepaae bóe daalopa ape yóló, dape siré kutu beterapó.

¹⁵ “Tęrapa ęta, ęłemi nokole whį kaae waalo ai ape! Atęyaałopa, whį me de noke fió muni turukó holóló bitu, ama der- atere kuti ę betere tikimótóróti muló betae. Atétere whį ę Talené wisiró beterapóló hajné sukęalo ai ape.

Ti noa yaqsóró mei, ama tiki daapi hąle furaalu hale yaqsóró dapó,” yalepó.

¹⁶ Téro, atima fóló kale topo whįrape dape siré kweyóló, Israel fake so whįné Hibru foné doi muló betere, Armakedon haepaae tourąle walepó.

¹⁷ Téro kale weįike *ensel*-né ama tare okopoi nukumó belere ąla są tó tuąmó sunée deralemó, kale momatere be tuąmó tetéróló kaae tare doasi betere tikimó fo fakeyóló duraalu, “Mió ai kemeyale ape!” yalepó. ¹⁸ Ai fo yalemó, epée fitąa yóo, be są kilí kilí yóo, doasi sapalaa dorowóo, mo doasi bao yóo, yalepó. Take i haemó betale so whįné etei kaae bao depa mo kilinipó. ¹⁹ Ai bao duraalu, kale doasi be hulua tekeyóló sore fake daane fóo, i hae kwia feamó tẹ mole doasi be huluarapekélé kolokóló doropóo, yalepó. Kótóné kale doasi doi mole Babilon tuę muturaalu, ama dowi fopaae bole *wain* weį wutimó tepeyóló, kale so nópóló melalepó. ²⁰ Weįiné bopéróló daae mole hae kwia fea daani, alu yó molepó. Doasi daae mole hasi fosórapekélé kelalemó daani, aluyó molepó. ²¹ Ó sąmó doasi *ais* kapo du kaaené whįrape teįya yaai dorowalepó. Ai dorowale *ais* kanerape seķę ąleta, 50 *kilogram*-pó. Atimapaae atei mó dowi seķę ala erateremó, Kótó eróló tekani fo du betalepó.

17

Syaae kaae ąla tómó betere somó yale fo

¹ Téro, kale weįikeró okopoi nuku tare *ensel*-rapekó betą ę beterepaae wóló duraalu, “Kale

węirape tó mó betere doasi doi mole nó pu nokole soné dere alamó, kwia melaairetei yą lo yą paae yó melaalopa ape. ² Ai sota, i hae kwia fea tęteróló kaae tare topo whįrapetamo nó pu nuku betalepó. Téro, kale soné i hae kwiamó betó mole so whįkélé, nó pu nokole *wain* węi melale tikimó topo doyóló keyaa fu betalepó,” yalepó.

³ Téro, ę kale Dęi Kepe Wisi tuąmó betepa, *ensel*-né so whįkélé bitini hą le kó pu ką ae fi tikipaae beleyóló só ró felepó. Aimó bituraalu kelalemó, betą so mo sonaa i syaae kaae ę la tó mó beterepó. Ai syaae kaae ę lané ama tiki turó, Kótó aęratere doirape aseýó bopéroó, węikeró toporape daayóo, naase tamo sekęrape daayóo, epa kelalepó. ⁴ Kale soné ama kutita, mo sonaairó sukutąitamo deróo, ama aure ę larapekélé, *kold kapané* alealeteiné hęre hęre yóo, mo doasi *moniné* sere kasa kasai kaneró du dui meleketamo sóo, erepó. Ama naasené tare *kold kapané* aleale wuti dolomó ke-laalokélé mo sonaalei ę laraperó ama nó pu nokole alané bólutamó deyóló ę anó beterepó. ⁵ Ama kinóló mole doi kutirimó aseęretei i ape.

DOASI BABILON-TA, NÓ PU NUKU BETERE SORAPERÓ I
HAEMÓ MOLE KELAALO MO SONAALEI
ALARAPETAMONÉ HAMAPÓ.

⁶ Téro yą lo kelalemó, Kótóné ama kae beteró betere so whį atimakótei, mepaae Yesuné yale ala i ape yóló yó melateremó dale so whįné samea naletikimó kale so ą topo doyóló keyaa fu beterepó. Atétere ala kolóló, ę sira yale sųpó. ⁷ Atétepa, kale *ensel*-né ę paae duraalu, “Yą noatepa siratu bitute? Ai węikeró topo daayóo, naase tamo sekę daayóo, ere syaae kaae ę laró

ama sisó tó mó betere sotamoné kinóló mole ala bete yąło yąpaae hąkearóló yó matapa wosae. ⁸ Naaó kelale syaae kaae ọlata, take betaletei, mió bitinipó. Tépaitei, take mo apaae derepale wosono dolomó sókó holóló, ą doraai ẹale muló betere tikipaae faalo ai ape. Mepaae so whị i haemó bitu, atimané doi take keké nale alimótei mo ti betere *buk*-mó munipó. Atére so whịné kale syaae kaae ọla kilituraalu, doasi sira yaalopó. Ti noatepae, take ą betepa kolóo, mió bitini alu yóo, nalo momó sókó wóo dereteinépó.

⁹ Naaó ai kelale alata, mo kisipa tiki fosó fosóyóló dotorọẹ fale whịné betą bete tokóló kolóló tuẹnérápó. Kale wẹikeró toporapeta, ti kale soné ama ero dée daalóló betere wẹikeró hae durapepó. ¹⁰ Me beteta, ti kale tẹteróló kaae tare wẹikeró doasi topo whịrapepó. Ai wẹikeró whịrapekó, aporó whịrape atimané tẹteróló kaae tare ala kemeyalepó. Até yóló betą whịné tẹteróló kaae tare ala betą hąle erapó. Atépa, nalo me whị wouraalu, ama tẹteróló kaae tare ala sawa sukamó maaté kaae tawaalopó. ¹¹ Ai kale syaae kaae ọla take betaletei, mió bitinipó. Ọta kale tẹteróló kaae tare wẹikeró doasi topo whịrapekótei, ąkélé atimatamo touróturaalu bokówalerópó. Ai wẹikeró topo whịrapetamo betámó beteretei, ą doraai tukóló muló betere alapaae fu beterapó.

¹² Naaó kelale naase tamo sekẹrapené beteta, naase tamo tẹteróló kaae tawaaire doasi topo whịrapepó. Ti mió atimané tẹteróló kaae tawaaire ala sini, téyópó. Take atima doasi doi

muǒpóló mené sóró beteraalopó. Atéro sóró beteratepa, kale syaae kaae ɔlatamo betą bitu, sawa sukamó tẹteróló kaae tawaalopó. ¹³ Atima fea mo betą kisipatóró muóló, kale syaae kaae ɔlapaae naaotóró kaae tawae yóló, fotokǒró tẹteróló kaae tare alatamo melaalopó. ¹⁴ Ai fak-erape atima touyóló kale *Sipsip* hupu maletamo bóe daalopó. Téyaalotei, kale *Sipsip* hupu malené atimatei dóló tẹteraalopó. Ti noatepae, ąta i haemó betó mole talerape tẹteróló kaae tare Tale betóo, mepaae hae kwia tẹteróló kaae tare topo whįrape tẹteróló kaae tare topo whį betóo, erapó. Atéru, ą sya fóló ama ala eró tare so whįta, ti ątamo betąmó betaalopó. Atimata, ama ape yóló sókó su yóló, kae beteró betere so whįpó,” yalepó.

¹⁵ Téro, kale *ensel*-né ępaae duraalu, “Kale nópu nokole so betere weįrapené beteta, i ape. Kae kae tiki daae mole so whįkélé, kae kae touró betere fakekélé, kae kae *Gavman*-né tẹteróló kaae tare so whįkélé, kae kae be fo bole so whįkélé mo fea tómó, ai so ą beterapó. ¹⁶ Kale syaae kaae ɔlaró naase tamo sekęrapetamoné kale nópu nokole so hǒróló, bóe daalopó. Atéturaalu, ama kuti fea sorokóló taae faróló tiki daapi hąle betepa, ama tiki mi fea sorokóló nóló diri hąle simó sukųlaa dǒpóló biliraalopó. ¹⁷ Ti noatepae, kale naase tamo sekęrape atima fea fo dokóló betą tuę mutu, atima tẹteróló kaae tare fotokǒ kale syaae kaae ɔlapaae melaalopó. Até yaaire alata, Kótóné ama eraalopó yóló muló betere fo dokonótu mo erǒpóló, atima tuąpaae bulaalopó. ¹⁸ Naao ai kelale sota, i haemó betó mole topo whįrape

tęteróló kaae tare doasi doi mole be huluapó,”
yalepó.

18

Babilon kolokóló derepele fo

¹ Ai ala yóló kemetepa, me *ensel* hepen bemó dorowou betepa kelalepó. Ai sekéné, fea ala ama tęteróló kaae tawóló beterópóló, mené ą sóró beteró beterapó. ą tuąmó ere kokoné sini de wisi-naale i hae kwia feapaae deřalepó. ² Téró, kale sekéné mo doasi fo fakeyóló fotokqiné duraalu, “Ai kolokó dorowóló mole ape! Kale doasi doi mole be hulua Babilon kolokóló dorowóló mulapó.

Ti ai sota, dowi keperape betere be alée fóo, mepaae kae kae dowi keperaperó hqkolo yóló kelaalo mo sonaalei barapetamo, betere tiki alée fóo erapó.

³ Ti noa betené mei, hae kwia kae kaemó betó mole so whı ai soné ama nópu nokole ala tokóló yateiné *wain* wıi nóló, keyaa fu dere kaae du betalepó.

I hae kwiamó betó mole so whı tęteróló kaae tare topo whırapekélé, kale sotamo nópu nukua yalepó.

Ai soné ama doasi nélire alané, i hae kwiamó ęla ęla dotonóló duputu betere so whıiné *moni* mo dekéro siré feleteiné néli whıi betalepó,” yalepó.

⁴ Téró hepen bemó me i fo depa wosalepó. “Yąlo so whı-ó, ai sotamo betere so whı kua dolomó beteretei taaróló sókó ape.

Ama du betere dowi alarape diąpaae tokó melóturaalu, ama saaire dowi sekei alarape diąkélé saqsórópa, taaróló ape.

⁵ Ti noatepae, ai soné Kótóné yóló muló betere fo tikale dowi ala muté holóló, hepen bepaee sókó horapó.

Atéremó, melaaire dowi kwia Kótóné keteréni, kisipa hąle yó tarapó.

⁶ Kale soné ama melatua yale weį ąpaae tokó mótu, ama male sų tó mó me beleróló ątei nópóló melae.

⁷ Kale so ą doasi doi mulapóló, wisi wisi ąla dekeró nuku betale sųtóró, susupui alaró dekeńé sukutere alatamo sópóló melae.

Ama tuę tiki tuąmó bopé fake dere ala bulu, ‘Ęta, mo doasi tẹteróló kaae tare topo so betereteiné ę wulia so betepapakó woletere ala enénipóló,’ kisipa mutu beterapó.

⁸ Atéreteiné, mo betą sukamó ama sópóló dąle muló betere sekei alarape hąsó kó feni, mo saalo ai ape.

Ai alarapeta, i ape. Sukutere alakélé, dekeńé sukuturaalu wole yaaire alakélé, wotené sukutere alakélé, tiki siné dóló sukųlaa dokole alakélé, ai ala fea mo amatóró saalo ai ape.

Ti noatepae, ai somó dowi kwia melaaire Tale Kótóta, mo doasi fotokọ bole bete Talepó,” yalepó.

⁹ Ai sotamo nópu nokole ala yóo, ama wisi wisi ąla sóo, du betere tẹteróló kaae tare topo whįrapené ai kale so dukuraalu, hotere sukuli kelalepó. Atétepa, atima kale so dekeńé sukóló

woletu betaalopó. ¹⁰ Kale so atéro duku bitu, susupu sóró kaketu betere alamó, atima witu-raalu, tika mo umó daae mulu, i fo yaalopó.

“Mo doa wió! Doasi doi mole be hulua-ó, wió yae!

Doasi fotokọ bole be hulua Babilon, ya do-raalopóló tukóló muló betere alata, betą sukakelemótóró mo ti doróló ai kemeyale ape.”

¹¹ I hae kwia feamó ọla ọla dotonóló duputua yale whįrapené kale so dokole kolóló, dekené sukuturaalu, moló-u yaalopó. Ti noatepae, atimané ọla ọlarape take yale kaae whįrapené momó kae duputimipó. ¹²⁻¹³ Atimané atéro dotonótu betere ọla ọlarape i ape. *Kold kapa, silpa kapa*, doasi *moni* sere kasa kasai kanerape, meleke kaae, du dui ọla, *linen* kuti wisinaale, sukutai kuti, *silk* kuti, sonaai kutikélé, fetera kaae ọla *sitron* nikélé, hupu sekéné aleale kae kae ọlakélé, doasi *moni* sere nikélé, *brons kapa, aiyon kapa*, be tẹtere kane fake wisinaalekélé, *sinamon* fetera kaae ọlaró mepaae kae kae fetera kaae ọlatamokélé, simó bilitepa felé ọla wale ni sekaę kaae ọla mura ni fekélé, *frenkensense* ni fekélé, *wain* weikélé, *Olip* ni duné aleale *welkélé, flawa* wisinaaleró *whit*-tamokélé, *bulmakau* hupuró *sipsip* huputamokélé, *hos* hupuró ama sįyóló só kotere ọlatamokélé, wae sóró kutó diratere so whįró hąle mo betere so whįtamoné tikiró asotamokélé dupu yaalopó.

¹⁴ Atimané i fo yaalopó. “Naao senée du betale ni du mo ti aluyalepó. Naao wisi wisi ọlaró néli butukutu betale ala wisinaaletamo

aluyaleteiné momó kae kelaalomeipó.” ¹⁵ Téro, ai kale dosąayale ęła ęlarape dotonóló néli botokó fu betale whįrape atima kale so doasi susupu sóró kaketu betere alamó, atima wituraalu, tumó daae mulu, deķené sukóló fakeyóló etei wole fo yaalopó.

¹⁶ “Doasi wió yae! Doi mole doasi be hulua-ó, yą tuąmó betó mole so whįné aure ęła ęlarape i ape. *Linen* kuti wisinaalekélé, sukutąi kuti, sonaai, *kold kapa*, doasi *moni* sere kaporó du dui melekerapetamoné au wisinaale yóló néli whį betaletei, mió wió yae.

¹⁷ Doasi *moni* sere wisi wisi ęła fea hąleke sukamótóró doyóló ai kemeyale ape.

Doasi węi nuku só kotere so whįkélé, ai nukumó kotere so whįkélé, nuku tuąmó kutó ditero so whįkélé, *moni* saaire kutó ditero so whįkélé, mo fea tumó kese anóló daae muaalopó.”

¹⁸ Kale so dukuraalu hotere sukuli kolóló, atimané i fo yaalopó. “Atei kae doi mole doasi be hulua wisinaaleta, me kae mei, mo betątóró tęnapó,” ¹⁹ Atétepa, deķené sukuturaalu, atima hae diyóló, etei wole fakeyóló du betaalopó.

“Wió! Doasi doi mole be hulua-ó, wé! naao teyae. Ai soné doasi węi nuku talerape atima *moniné* doasi néli whį beteralepó.

Téyale sotei, hąleke sukamó ą mo ti doyalepó.

²⁰ Ó hepen bemó betó mole doasirape-ó, ai sopaae eratere alamó dią hąiné sukuu betae.

Kótóné dowi ala kemeróló kae beteraleso whįkélé, *aposeł* whįrapekélé, Kótóné fo

eraterere kóló whįrapekélé, hajné sukutu betae.

Ti noatepae, ai soné diąpaae erale sekęi alamó, kwia Kótóné ąpaae tokó melalepóló, dią hajné sukutu betae.”

21 Téro, doasi fotokę bole *ensel*-né mo doasi kane fake tao sóró doasi węi kęla tópaae taae deróló duraalu,

“I doasi kane taae derótu dere kaae, kale doi mole Babilon be hulua kolokó dorowóló, mo ti doraterere be, momó kae tęyaalomeipó.

22 Yą tuąmó *kita* kaae ęlané halekélé, wole fokélé, fó wutiné haleró *kapané* aleale ukulumó wutiné haletamo momó kae wosaalomeipó.

Be tętere ala ó nuku wisiraterere ala ó kae kae fosó fosótere whįrape mo feata, Babilon yą tuąmó mo kolókélé yaalomeipó.

Whiti o du derąketuraalu, kane fakené halekélé, momó kae wosaalomeipó.

23 Kale *lamp* sąné dęrótu beteretei, momó kae dęraalomeipó.

Soró whįtamo dokóló ęla deturaalu, hękese detere fo momó kaae wosaalomeipó.

Naao ęla ęla dotonóló duputua dere whįrapeta, i haemó doasi doi mole whįrapepó.

Naao isi whįné dere alané kae kae *Gavman*-né tęteróló kaae tare aąmó betó mole so whįkélé, fea kọpaae ęlisóró fu betalepó.

24 Kale so tuąmó, Kótóné fo eraterere kóló whįrapekélé,

Kótóné ama kaae beteró betere so whįkélé,

bóené mepaae i haemó betó mole so whį dale sameakélé ą tuąmó mupa kelalepó,” yalepó.

19

Talené doi hale sóró horópoló yae!

¹ Ai ala yóló kemetepa wosalemó, ó hepen bemó so whį mo hąle ąla kaae wó muluraalu fo tiki whaa du betalepó. Atéro duraalu, “Talené doi hale sóró horae.

Mo ti aluyaqsóró tao sere alakélé, ama ere alané doasi doi mole alakélé, fotokọ doasi bole alakélé, bete Tale dąné Aya Kótó ątórótípó.

Ti noatepaae, ama taleyóló só deratere ala họko ini, mo alatóró sya furaalu, dono taletua dapó.

² Atéturaalu, kale doasi doi mole nópu nokole soné ama du betale alané i haemó betó mole so whį kópaee faróló doralepó. Até yale alamó, Kótóné ama kutó diratere whįrape dóló sókó fale sameamó kwia tokó malepó,” yalepó.

³ Téro atimané momómo fo fakeyóló duraalu, “Talené doi hale sóró horae.

Kale so duku bituraalu hotere sukuli tukókélé ini, hąle holótóroti tarapó,” yalepó.

⁴ Ai fo deremó, kale 24 whį disiraperó kale douró betere ąlarapetamo kale tẹteróló kaae tare doasi betere tikimó deraapisa fóló fió mulu fo fakeyóló duraalu, “Mo kée, Talené doi hale sóró horópoló yae!” yalepó.

5 Tétépa, kale tẹteróló kaae tare doasi betere tikimó sókó wale foné duraalu,

“Talené kutó diratere so whįrape-ó, dią ąpaae winé sukóló, doasi doi mole so whįró doi munire so whįtamo feané dą tẹteróló kaae tare Kótóné doi hale sóró horótu betae,” yalepó.

6 Tétépa yąlo wosalemó, so whį mo hale ọla kaae wó muluraalu dere fo tiki whaata, mo doasi wẹi doų kąatu dere hu kaaeró doasi be sapalaa dere kaaetamo yóló duraalu,

“Talené doi hale sóró horae.

Dą kaae tare doasi fotokọ bole Kótóné ọla ọla fea amatóró tẹteróló kaae tareteiné ama doi hale sóró horae!

7 Dą fea hajné sukóló hẹkeseturaalu, ama doi doasi muópóló hale sóró horaalopa siépe.

Ti noatepae, kale *Sipsip* hupu malené so dokaaire be dẹ sókó wapa, kale sekéné dokaaire soné ama auyaaire ọla ọla donoróló muló beterapó.

8 Kale so ą derópóló, fokó fale dẹi *linen* kuti wisinaale melalepó,” yalepó.

Ti ai kale dẹi *linen* kuti wisinaaleta, Kótóné ama kae betere so whįrapené du betale mo donoi alapaae dó faróló erapó.

9 Tétépa, kale *ensel*-né ẹpaae duraalu, “I fo aseyaе. Kale *Sipsip* hupu malené so dokaairaalu, ọla deyaalopa ape,” yóló dape sere so whį mo doa hajné sinópóló yae. Téró ama duraalu, “Ita, Kótóné ama kọlómó sókó wale fotoró dapó,” yalepó.

¹⁰ Até deremó, ę ama hó aqmó deraapisa fóló fió mulu, ąpaae moma yaai yalepó. Atéyalemó, ama duraalu, “Atékese! Ęta, ęaró Yesuné yale ala mopóló eró tare so whįrapetamo da betą kutó diratere sekępó. Tęrapa, Kótó aqmó sukóló bitu, ąpaae betą moma yae. Ti noatepae, Yesuné yale ala etérópóló yó matere alané Kótóné kóló whįrapené dere fo fea bete hąkearótu beterapó,” yalepó.

Đęi hos hupu tómó betą sekę whį betepa kelale fo

¹¹ Téro ęalo kelalemó, hepen be tu tukwę fóló, đęi *hos* hupu ę daalepaae anóló daalepó. Ai hupu tómó betere whį mo foné betetóró bitu, Talené ala eró tare Sekępó dua dapó. Ai sekęnéta, fo tokóló taletere alaró bóe dele alatamo, mo donotóró dua dapó. ¹² Ama keleta, mo si mi kaae buóo, ama topomó kale tęteróló kaae tare doasiné deró betere topo taorape deróo, erepó. Ama tikimó aseýóló muló betere doita, mo whį betąnékélé tuęni, ama betą tuęrapó. ¹³ Ama deró betere kutita, samea belere dolopaae deróló sókó sale kuti deró beterepó. Ai sekęné ama doita, ti Kótóné fopó. ¹⁴ Hepen bemó bóe dele *amirape* atimané deró betere kutita, mo fokó fale tikimó đęi *linen* kuti wisinaale deróló, đęi *hos* hupurape tómó betóló, kale sekęné sisómó wó tarepó. ¹⁵ I hae kwia feamó betó mole so whįtamo bóe dóló tęteraairaaalu, bóe dele fosói sepake ama kólómó sókó wapa kelalepó. “Amata, *aiyon kapané* aleale nópulu taru, haemó betó mole so whį fea ama tęteróló kaae tawaalopó,” Ai sekęnéta, mo

doasi fotokọ bole Kótóné dowi fopaae buló, kwia melaire *wain* képi du wẹi dọtere tikimó ẹyiya ẹyiya du betera. ¹⁶ Ama deró betere fọloi kutiró *fasatamomó* etei doi asẹrepó.

TẸTERÓLÓ KAAE TARE WHỊRAPE KAAE TARE DOASI
BETÓO,
I HAEMÓ DOASI ỌLA ỌLA TALERAPE TẸTERÓLÓ KAAE
TARE TALE BETÓO,
erapó.

¹⁷ Téro yálo kelalemó, betą *ensel* suka ke tómó daalu, kale sikimó sẹ kotere barapepaae fo fakeyóló duraalu, “Kótóné ama doasi ọla deyaalopa, dią fea betapaae tourąle ape. ¹⁸ Ti hąle mei, Kale tẹteróló kaae tare doasi whịrapekélé, diki tare whịrapené topo whịrapekélé, mo doasi fotokọ buló bóe dele whịrapekélé, *hos* hupuraperó ai hupu tómó betóló kotere whịrapetamokélé, mo hąle betere so whịraperó wae sóró betere so whịrapetamokélé, mo doasi doi mole whịraperó doi muni hąle betó mole so whịrapetamokélé, i dosąayale so whịrapené tiki mirape dią naasepólópa, tourąle ape,” yalepó.

¹⁹ Téro yálo kelalemó, kale *hos* hupu tómó betóló wale whịró ama bóe dele *amirapetamo* atima daae molepaae, kale syaae kaae ọlaró hae kwia fea tẹteróló kaae dilikiyó mole doasi topo whịrapetamokélé, atimané bóe dele whịrapekélé touyóló, bóe daai wou betepa kelalepó. ²⁰ Téyaleteti, kale syaae kaae ọlaró, Kótóné ama ọlóló whịpóló kapala fo yó matere whịtamo tawóló dokóló mulalepó.

Ti ai kale kapala fo yó matere ọlóló whịné kale

syaae kaae ɔlané doi doasi muǒpóló kae kae kelemei alarape erótu betalepó. Tí ama ai kelemei alarape yó melaletikimó, syaae kaae ɔlané siri sóo, ama aso aǒmó sukóló bituraalu, dukiratere fo yóo, du betale so whırape kǒpaae fǒpóló dilikitu betale whıpó. Téro, ai kale dokóló mulale sekę tamo, betepatei doasi *sulpa* si duku betere weı kęla belerepaae taae deralepó. ²¹ Téturaalu, atimaamoné bóe dele whırapeta, kale *hos* hupu tómó betóló wale whıné kǒlómó sókó wale sepak-ené mo fea dóló muó mupa, barapené tiki mi nóló depe watamo fua yalepó.

20

1,000 ba fo tuǒmó yaaire ala

¹ Téro yǒlo kelalemó, ó hepen bemó *ensel* dorowou betalepó. Ai sekéné ama naasenéta, mo apaae derepale osono dolo tu kinaaire *kiró* mo doasi *sein* képitamo tarepó. ² Ai *ensel*-né kale wuli disó botokǒ sóró tawalepó. Ai disóta, mo taketi bitiré wale wulipó. Ama doita, Satan ó Kótótamo bóe du betere dowi kepepó. Ǻ dokóló muló betepa 1,000 ba fopi kemeraairaaalu dokalepó. ³ Téro, *ensel*-né kale wuli disó tawóló, mo apaae derepale osono dolopaae sóró taae deróló, tu kinóló diriratere ɔlané mo ti diriralepó. Ti aita hǒle mei, i hae kwiamó betó mole so whı ama momó kae dilikóló kǒpaae falaǒsóró, 1,000 ba fo tuǒmó hǒle beteralepó. Ai ba forape kemetepa, kılipaae sawatamo sukamó maaté Ǻ sókó daalóló, hǒle beterǒpóló eraalopó.

⁴ Téro yąlo kelalemó, tẹteróló kaae tare doasi betere searapemó fo tokóyóló taletere whịrape betó molepó. Aimó, Yesuné yale alarape i ape, yóló yó matere foró Kótóné fotamo yó materemó, depa tikale so whịné keperapekélé, betó mupa kelalepó. Ti ai so whịrapeta, syaae kaae ọlaró ama asotamo aqumó sukóló bitu, dukiraterere fo ini yóo, ama siri atimané kutirimó ó naasemó dakeraterere hẹ dua yóo, yale so whịrapené keperapepó. Ai sekẹrape atimata, kepaayóló bituraalu, Yesu Kerisotamo betamó 1,000 ba fo tuqmó tẹteróló kaae taté fópóló sóró beteralepó. ⁵ Téro, kale hąle sukąle whịrape atima hapale kepaani, 1,000 ba fo kemeyale kịlipaae, ti kepaayóló betó muaalopó. Ti aita, folosóro kepaayóló betereiteipó. ⁶ Ai kale folosóro kepaayóló betere so whịta, Kótóné ama kae sóró betero betereiteimó, mo hąiné sukóló betó mulapó. Tamo dakoróló sukutere alané atimapaee me sekẹi ala eranénipó. Tėni, atima Kótóro Yesu Kerisotamopaae momaraterere so whị bituraalu, ątamo betamó tẹteróló kaae taté fóló 1,000 ba fo kemeyaalopó.

Satan doasi dele tuqmó beteraaire fo

⁷ Téro ai kale 1,000 ba fo kemetepa, Satan ą *dipula* beteraletei fópóló sókó daalaalopó. ⁸ ą atéro sókó daalatepa furaalu, i hae detene fale douro kwiamó betó mole Kok fake so whịro Makok fake so whịtamokélé dilikóló, dape siré kweyóló bóe daai, betąpaae tourąle waalopó. Ti ai so whị, fea touróturaalu, weị atiką sųpó. ⁹ Ai tourale *amirape* atima, delaapemó daayóló doasi mulure hae tiki mo sųróló wou, Kótóné ama

so whį betere tiki boperóló betó molepó. Ai so whį betere tikita, ti Kótóné ama yaala sókó fóló mole be huluapó. Atima atéró be naai boperąle wóló betó molemó, ó hepen bemó si sókó dorowóló atima mo fea doló kemeralepó. ¹⁰ Ai kale siné doló kemerale so whį dilikąle Kótótamo bóe du betere dowi kepe ąta, kale *sulpa* si dó tare węi kęła belerepaae taae deralepó. Take kale syaae kaae ęlaró Kótóné ama kóló whįpóló kapala fo yó male whįtamo taae derale kaae ąkélé atéró taae deralepó. Atima atéró bituraalu, diki-tamokélé, dętamokélé, doakale dele doasi sóró kaketu betere alata kemekélé ini, hąle yótóróti tawaalopó.

Sukąle so whįtamo fo tokóló tale yaaire fo

¹¹ Téró, kale tęteróló kaae tare doasi betere dęi *sea* kolóo, ai *sea* tómó betere sekę kolóo, yalepó. I haeró sątamota, ai kale doasi kilitu botokó feletei, kinaaire tiki meipó. ¹² Téró yąlo kelalemó, take sisiraae fele doasi doi mole so whį ó doi munire so whį, doasi betere tikipaae anóló daae molepó. Atima atéró daae mole tuąmó, *buk*-rape dąae faróló muó molepó. Me dąae faróló mole *buk*-ta, mo titóróti betó tare *buk*-pó. Take kale sisiraae fele so whįrape atimané yale alarape fea kale *buk*-rapemó aseýóló moletei, kolóló taleyalepó. ¹³ Kale węi nóló sisiraae fua yale so whįta, doasi węi kęlané dotonale holóo, mo sukutere so whįrape fóló betere bemó betó mole so whįkélé, ti ai benétei dotonale wóo, sukutere alané tao tare so whįrapeta, ti ai alanétei dotonale wóo yalepó. Atéró wóló betó mupa, atima dokę feané yale ala

donotóró taletua yalepó. ¹⁴ Téro, kale sukutere alaró sukále so whırapetamo betó mole tiki kale doasi si duku betere weı kęla belere dolopaae taee deralepó. Ti ai si duku betere weı kęlapaae taee deraleteita, tamoróló sukutere tikipó. ¹⁵ Téro, mo ti betere *buk*-mó doi munire so whı kale si dó tare weı kęla dolopaae taee deralepó.

21

Kisi Jerusalem be

¹ Téro yało kelalemó, me i ala erepó. Take mole haeró hepen betamokélé kemeróturaalu doasi weı kęlakélé kemeralepó. Téturaalu, kisi hepen beró haetamo sókó wóló mupa kelalepó. ² Téro yało kelalemó, dowi ala betakélé munire kisi Jerusalem be hulua wisinaale, Kótó betere hepen be taaróló dorowou betalepó. Ai be huluané ama ere alata, so seimale ą whıtamo dokaai kolóló kokoné sukı kuti wisinaale derótu dere kaae erepó. ³ Téro yało wosalemó, kale tęteróló kaae tare doasi betere tikimó fo fakeyóló duraalu, “Mió, Kótó ą betere be dorówóló so whıtamo muóo, ąkélé atimatamo betóo, yaalopó. Atéru, atima ama so whıtóró betepa, Kótó atimatamo betámó bitu, atima tęteróló tare Tale betaalopó. ⁴ Atéro, so whı feané wole kaape ai sekęné helekóló kópuraalopó. Tétu, sukutere alakélé, dekęné sukóló wole dere alakélé, moló hu dere alakélé, dele sere alakélé, momó kae yaalomeipó. Ti noatepae, folosóró yale alarape fea mo ti kemeró betereiteinépó,” yalepó.

⁵ Téro kale teteróló kaae tare tikimó betere doasiné duraalu, “Fea ọla fea yało kae kisi aletu beterapó! Térapa, yało i yale fo naao aseyaē. Ti noatepae, i dere fota, mo yaai dere ala dapóló diaaọ tuę tiki tiranérápó,” yalepó.

⁶ Téro ama ępaae duraalu, “Ai alarapeta, fea ai yóló kemeyale ape. Ęta, *Alaparó Omekatamo* bituraalu, kaae sereteiró kemeratereteitamo, mo ętórótípó. Whị me de wẹi nokole depa, mo ti betó tare tikimó wó tare wẹi me ọlané dupuni, hałe nópóló yało melaalopó. ⁷ Whị me de ą tų wisipaae faai fełalemó, sesétepakélé hepée taae faróló wale whịné i ọla ọlarape fea take ama saalopó. Téturaalu, ę ą teteróló kaae tare Kótó betóo, ą yało naale betóo yaalopó. ⁸ Téretei, atimapaae me sekei ala eraqsóro witu, ę taaróló fele so whịkélé, whịné sotamo dere ala kaae yóló whị hamomatamotei dowi ala du betere so whịrapekélé, whị dele whịrapekélé, nópu nokole so whịkélé, kapo nipaae momatere alaró herei whétamoné whị dele so whịkélé, kapala fo dere so whịkélé, mo fea atima betaaire tikita, *sulpa* si duku betere wẹi kẹla ai ape. Ti aita, atima tamoróló sukąaire alapó,” yalepó.

⁹ Mo kemeróturaalu melaaire wẹikeró sekei alarape belere nuku tare wẹikeró *ensel*-rapekó betąané ępaae duraalu, “Kale *Sipsip* hupu malené dokaaire so, yało yaąpaae yó melaalopa, kelaai ape,” yalepó. ¹⁰ Ai fo deremó, Dei Kepe Wisiné ę fotokọ bulatepa, kale *ensel*-né mo doasi sokore hasi fosópaae beleyóló sóro holalepó. Atéro sóro holóló beteró bituraalu, dowi ala mo betąkélé

munire be hulua Jerusalem, Kótó betere hepen be taaróló ai dorowou beterepa, kelae yóló yó malepó. ¹¹ Tétepa yąło kelalemó, ai kale be hulua, Kótóné ama ere deŋ wisinaale deŋyó faralepó. Atéró ere deŋta, mo doasi *moni* duputere kanené kasa kasare deŋ kaae erepó. Mo haŋle kaponé ere deŋ kaae mei, *jaspa* kanené deŋ kaaetórótípó. Mo huŋkulukélé ini, *klas* kasa kasa kaae yó fi *jaspa* kane wisinaalené ere deŋ kaaepó. ¹² Ai be huluata, doasi dopóku ópaae horóló deyóló boperó beterepó. Ai dopóku tuąmóta 12-tuŋ dolorape móo, ai tuŋ kaae diliki yóló 12-*ensel*-rape daa yóo, ai tuŋ serekemó 12-Israel fakené doirape aŋeŋ yóo, erepó. ¹³ Ai dopókumó suka hoterepaaeróló tuŋ sereke sore muóo, suka doropolepaaeróló tuŋ sore muóo, *saot* deŋpaaeróló sore muóo, *norti* deŋpaaerólókélé, sore muóo erepó. ¹⁴ Ai kale be hulua boperóló dere dopóku 12-ró kapo fakerapené mukuté mulaté horepó. Ai 12 mukuté mole kane fake tómó, kale *Sipsip* hupu malené sóró beteroó betere 12 *aposel* whiŋrapené doi aŋerepó.

¹⁵ Ẽtamo kale fo yale *ensel*-né kale be hulua akélé, dopóku dereteikélé, tuŋ serekerapekélé fea suŋróló daŋle saairaalu *kold* *kanané* aleale dotó tiki tarepó. ¹⁶ Ai be huluata etéró teŋyóló muló beterepó. Filipaaró betereiteiné daŋleró doló faló betereiteiné daŋletamota, ti mo betą kaaetórótípó. Kale sekéné ama daŋle saai tare dotó tikiné be hulua suŋróló daŋle saleteita, doló faló betereiteikélé, filipaaró betereiteikélé, ópaae horeiteikélé, mo betą kaaetóro 2,200 *kilomitapó*. ¹⁷ Téró kale

dopóku hapólu eretei ama dąle saleteita, 65 *mita*-pó. Ti ai *ensel*-né ama dąle sere alata, me kae mei, mo whinė dere kaaetóro yalepó. ¹⁸ Ai kale be hulua boperóló dere dopókuta, *jaspa* kanené aleyóo, be huluata, ti *kold kapa* wisinaalené aleyóo erepó. Ai kale *kold kapata*, hųkukuléké ini, mo kasa kasa yó fipó. ¹⁹⁻²⁰ Ai be hulua boperóló dere dopóku mukuté mulaté hore kapo fakerape aurairaalu, mo doasi *moniné* duputere kae kae kasa kasai kanerapené auró beterepó. Folosóro kaae suraalu, muló betere mukuté *jaspa* kanené auróo, 2 ti *sapaia* kanené auróo, 3 ti, *kalsitoni* kanené auróo, 4 ti *emerald* kanené auróo, 5 ti *sadoniks* kanené auróo, 6 ti *kanilian* kanené auróo, 7 ti *krisolait* kanené auróo, 8 ti *berl* kanené auróo, 9 ti *topas* kanené auróo, 10 ti *krisopres* kanené auróo, 11 ti *jasint* kanené auróo, 12 ti *ametes* kanené auróo, erepó. ²¹ Kale ai dopóku 12 tų serekerapeta, 12- du dui meleke *perl*-né alée molepó. Ai tų sereke dokęta, mo betę *perl* doasiné alée mulapó. Be hulua tuęmó fale tųta, *kold kapa* wisinaale mo kasa kasai *klas* kaaené aleyóló molepó.

²² Ai be hulua tuęmó Kótópaae momatere be betę kilinipó. Ti noatepae, doasi fotokę bole Tale Kótóro kale *Sipsip* hupu male atimaamota, ti ai be hulua tuęmó ere momatere betórotipó. ²³ Ai be huluamó Kótóné ama ere alané dęró kale *Sipsip* hupu malené dętamo eró betereteiné, suka dęró wélié dętamo mo yąyą inipó. ²⁴ Ai be huluamó dęyó fale dęné, i haemó betó mole so whi fea diliki dolomó kutu betaęsóro, ai dęné dęraalopó. I haemó tęteróló kaae tare topo whįrape, atima

mo kelaalo kokõné sini ala wisinaale sóró wóló ai be tuąmó mulaalopó. ²⁵ Ai be hulua tuąpaae faaire tųrape kinókélé ini, mo hąle tukwę faróló muló betaalopó. Ti noatepae, aimó diki dere ala muni, dętóró yó tareteinépó. ²⁶ Kae kae hae kwiamó betó mole so whįné doasi doi mutere alaró, kelaalo kokõi ala wisinaaletamo sóró wóló ai be hulua tuąmó mulaalopó. ²⁷ Dowi ala mole whį ai be hulua tuąmó sókó faalomeipó. Halei ala dere whįraperó, kapala dilikitere so whį betąkélé ai be hulua tuąpaae mo sókó faalomeipó. Kale *Sipsip* hupu malené mo ti betere *buk*-mó doi mole so whį betą ai be huluamó fóló betaalopó.

22

Mo ti betó tawaaire węi

¹ Téró, kale *ensel*-né ępaae mo ti betó tawaaire fu betere kikisi węi kelaai ape yóló yó melalepó. Ai fole węita, Kótóró kale *Sipsip* hupu male-tamoné tęteróló kaae tare doasi betere tikimó sorokó wóló, ai be hulua tuąmó fale tų seraa fu betepa kelalepó. ² Ai węi fóku uté dęró, ité dętamomó mo ti betó tare ni daalepó. Wélié dokõ fea ai niné du oletua dapó. Ai niné ama sókuta, i hae kwiamó betó mole so whį tuąmó mole kae kae sekei alarape fea i ni sóku fotokõné sumó wisiranérapó. ³ Take so whįné yale dowi alamó Kótóné erale sekei ala ai be huluamó momó kae muaalomeipó. Kótóró *Sipsip* hupu maletamoné tęteróló kaae tare tiki ai be huluamó mupa, ama kutó diratere so whįné ama erae dere ala erótu betaalopó. ⁴ Atimané ama keleppaa kolóo, ama

doi atimané kutirimó asey yó fóo, yaalopó. ⁵ Aimó be dikitere ala momó kae muaalomeipó. Atima suka deş ó saş deşkelé, yaşaterere ala mo enénipó. Ti noatepae, atima deş tuamó beterópóló Tale Kótóné ama ere deşné deşó betaalopó. Atéro bituraalu, betere dokş fea atimanékélé, fea ala fea teşteróló kaae taté fu betaalopó.

⁶ Tale şta, ama kşló whşrapené keperape teşteróló kaae tare Kótó beterapó. Atéru, mo felekemó eraaitereş ala ama kutó diratere so whşpaae ene fşpóló, ama *ensel* atima beterepaae dotşyalepó, yalepó.

Yesu walapóló ere fo

⁷ “Ş mo felekemó waalo ai ape. Kótóné i ala eraalopóló i *buk*-mó aseyre fo eró tare so whşta, Kótóné atima wisiralepóló, haşné sukutu betaalo ai ape,” yalepó.

⁸ I yale forape wosóo, yale alarape kolóo, yale whşta ş Jon-pó. I alarape yó male kşlipaae ai yó male *ensel* daale tikimó şpaae moma yaai deraapisa fóló fió mualepó. ⁹ Téyalemó, ama şpaae duraalu, “Atékese! Şta tale mei, daşmo wusuró Talené kutó diratere whşpó. Nonaaorape Kótóné kşló whşrapekélé, kale i *buk*-mó mole fo eró tare so whşkélé, daş fea betş kutó diratere fakepó. Térapa, Kótó aşmó sukşló bitu, ama doi betş sóró horótu betae,” yalepó.

¹⁰ Téró, kale dere kaae şpaae momó duraalu, “Kótóné i ala eraalopó ere fo hąkearóló i *buk*-mó aseyóló muló betere fo kinóló mulaşse. ¹¹ Dowi ala du betere so whşta, atima ai alatóró yó tanşpóló yae. Kae kae mo kelaalo sonaaiei dowi

ala du betere so whįta, ti ai alatóro du beterópóló yae. Mo donoi ala wisi du betere so whįta, ti atimané ai du betere wisi alatóro yó tanópóló yae. Me dowi alatamo hosekéni, Kótóné ama kae beteró betere so whį ti atima ai betere kaaetóro betó tanópóló yae,” yalepó.

12 “I dere fo wosae, ę mo felekemó waalo ai ape! So whį dokọ feané yale alamó tokọ melaai yąlo i tare duputa, ę wouraalu melaalo ai ape.

13 Ęta, *Alaparó Omekatamopó*. Folosóro kaae sóro betaleteiró, kemerąle foloteitamota ętórótípó.

Ọla ọla fea keké nale betekélé, fea ala touróló kemeratere betekélé, ti mo ętórótípó.

14 Deróló sókó fatere fọloi kutu fokotu betere so whįta, Kótóné wusiró beterapa haįné sukutu betae.

Ti atétere so whį be dopóku tų serekemó doasi be huluapaae sókó fóo, mo ti betere ni du tokó nóo, yaairetei, mo sųrapó.

15 Kale dopóku aqró haqrape betó mulapó.

Ai haqrapeta i ape. Whéro hereitamóné whį dele alakélé, kae kae hosų fo ó isi whįné dere alakélé, nópu nokole alakélé, whį dele alakélé, kapala kótóraperó keperapetamopaae momatere alakélé, kapala fo yóló whį dilikąai ekele du betere alakélé, i dosąayale alarape du betere so whį atima feata, dopóku aqró betó mulapó.

16 Ęta, Yesupó. I kelale alarape Keriso fake so whįné dosąayóló tuę yópóló, diąpaae yó male fae yóló yąlo *ensel* dotęyalepó.

Ęta, Depit kaayale beteró ama deté fele naalené naaletamopó.
Atéru, hįka be dęteretamo dęyó tare hęrepó,” yalepó.

¹⁷ Kale Dęi Kepe Wisiró whįné dokaai du betere sotamoné duraalu, “Ape,” du beterapó. Mepaae i dere fo wosetere so whįnékélé “Ape,” yópoló yae. Mepaae whį de węi nokole depa, ę beterepaae wópoló yae. Mepaae whį dené węi nenée du betepa, mo ti betó tawaaire węi dupuni, hąle sóró nale wópoló yae.

¹⁸ Kótóné i ala eraalopóló, *buk*-mó asęre fo wosetu betere so whį feapaae dirii ma fo i dapa wosae. Mepaae so whį denétamo i *buk*-mó móle fo tómó me kae beleróló depa, ti Kótóné i *buk*-mó bopetu betere seķei alarape ai so whįpaae mo turó eraalo ai ape. ¹⁹ Mepaae whį dené Talené i ala eraalopóló *buk*-mó móle fo mepaae kwia tokóló aluratepa, ti Kótóné atétere whįmó melaalopóló i *buk*-mó bopeyale mo ti betere ni du nóo, kae tęne be huluamó beteróo, yaai yale alatamo ama fasó saalopó.

²⁰ I kale asęyóló muló betere alarape kelale whįné duraalu,
“Mopó. Ę felekemó walapó,” fo dapó.

Tétepa duraalu,
“Mo kée Tęyópoló yae.

Tale Yesu-ó, yą ape,” dapó.

²¹ Tale Yesuné hąle tao sere ala wisinaale Kótóné so whįpaae wópoló yae. Mo kée. Tęyópoló yae.

Yesu Kerisoné So Whi Tao Sere Kisi Fo Wisi
The New Testament in the Folopa Language of Papua
New Guinea

Nupela Testamen long tokples Folopa long Niugini

copyright © 2005 Wycliffe Bible Translators, Inc.

Language: Folopa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 11 Nov 2022 from source files dated 9 Oct 2020

4e9b4b04-0b47-5583-9c4d-fb82cfdd65c2